

**Rollup Banner Hot Price! Best price in PNG!!**

**OFFER EXTENDED UNTIL 31st AUGUST**

**K440 inc. GST SINGLE SIDED** | **K825 inc. GST DOUBLE SIDED**

Only at... **THEODIST LTD** THE STATIONERY SUPERMARKET

• PREMIUM STYLE 85cm WIDE BASE  
• FULL COLOUR SEMI-GLOSS PRINT  
• DESIGN SERVICE AVAILABLE

Waigani Drive, POM Ph:313 9800 sales@theodist.com.pg  
Markham Road, LAE Ph:472 5488 saleslae@theodist.com.pg

# Oposisen redi long rausim O'Neill

OPOSISEN i statim pinis wanpela kemp long bungim ol memba, apim namba bilong Oposisen i go antap long 56 memba, na redim ol yet long rausim Praim Minista Peter O'Neill long vot i no gat bilip.

Oposisen i bihainim Seksen 145 bilong Mama Lo long kirapim vot i no gat bilip egensim Mista O'Neill, husat i bin abrusim pinis tripela mosen bilong rausim em.

Deputi Oposisen Lida Sam Basil bai muvim dispela mosen bilong kamapim vot i no gat bilip na makim Oposisen Lida Don Polye i kamap nupela Praim Minista.

Oposisen Lida Don Polye i tok ol i statim pinis wanpela kemp long bungim ol memba long rausim Mista O'Neill, na em i singautim arapela ol memba na minsta long gavman sait long joinim ol bikos Praim Minista i no ranim gut dispela kantri.

Mista Polye i les long tokaut long wanem hap dispela kemp i stap, tasol em i tok sampela ol memba i stap long gavman sait i redi long muv wantaim em.



Oposisen i laik makim Don Polye (raithan) i kamap nupela Praim Minista bilong PNG.

Mista Polye i autim dispela toktok long Tunde long dispela wok bihain long Suprim Kot i tokim Palamen long sindaun gen insait long 5-pela de, namel long Tunde na Sarere long dispela wik.

Kot i tokim Palamen Spika long larim vot i no gat bilip egensim Mista O'Neill i kamap namba wan samting bilong toktok long dispela bung.

Palamen Spika Theo Zurenuoc i tok save pinis long ol memba olsem Palamen bai sindaun long dispela wik Fraide long 2-klok apinun.

Mista Polye i tok namba wan samting ol bai mekim long Fraide apinun taim Palamen sindaun gen, em long larim mosen bilong vot i no gat bilip egensim Praim Minista O'Neill i kamap.

Bihain long Oposisen i autim

dispela mosen, ol memba bilong Praivet Memba Komiti bai bung na lukluk long dispela tok save pepa.

Sapos olgeta samting i stap gut, dispela komiti bai tok save long opis bilong Palamen Spika long larim vot i no gat bilip egensim Praim Minista O'Neill i kamap bihain long 7-pela de.

**I go moa long pes 3...**

## TOK SAVE!!

Toksave i go aut long pablik olsem Wantok Niuspepa bai ranim gen "Autim Tingting" we ol Wantok rida na pablik i ken salim teks mesej i kam long ol tingting, wari na toktok yupela i gat long ol samting i kamap long komyuniti, provins na kantri, ol samting i karamapim sait bilong sosel, politiks, ikonomik, sios, helt, edukesen na ol bikpela samting i kamap long kantri.

No ken salim teks i bagarapim ol sios, narapela manmeri, painim meri o penpren bikos Wantok bai no inap putim ol dispela long pepa. Sapos yu laik painim famili memba, hauslain na wanpisi i lus na yu no save em i stap we, yu ken salim teks i kam.

Edita bai gat fainol toktok long ol atikel bai kamap long pepa.

Telepon namba yu ken salim teks mesej i kam em: **71845906**

Tenkyu tru  
Edita-Wantok Niuspepa

## Insait:

**O' Neill: No ken westim taim - P2**



**NCD Gavana klinim Morata market long moning - P4**

**Edukesen minista ino wanbel wantaim UPNG kaunsil - P9**



**Buy Your Air Niugini Ticket Anywhere, Anytime Using BSP Mobile Banking.**

### Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via [www.airniugini.com.pg](http://www.airniugini.com.pg)
- > Available to Digicel and bmobile-vodafone subscribers. Mobile service charges apply.
- > Fare conditions apply.



**Air Niugini**

[www.airniugini.com.pg](http://www.airniugini.com.pg)



Travel Purchase Queries: 180 3444  
ehelpdesk@airniugini.com.pg

Mobile Banking Registration: 320 1212 / 7030 1212  
servicesbp@bsp.com.pg [www.bsp.com.pg](http://www.bsp.com.pg)

# O'Neill: No ken westim taim

**PRAIM Minista Peter O'Neill i tokim ol Memba bilong Oposisen i no ken westim taim na tingting long kirapim vot i no gat bilip taim Palamen i sindaun gen long dispela wik Fraide.**



**PRAIM Minista Peter O'Neill**

Suprim Kot i bin tokim Palamen long sindaun gen insait long 5-pela de na larim vot i no gat bilip egensim Mista O'Neill i kamap.

Palamen bai sindaun gen long dispela wik Fraide na Oposisen i tok ol i redi long muvim mosen bilong rausim O'Neill, na makim Don Polye i kamap nupela Praim Minista.

Mista O'Neill, husat nau i wok long kisim ol edvais bilong ol loya bilong em, i tok dispela vot i no gat bilip bai westim mani na taim bilong gavman.

Mista O'Neill i tok Oposisen i no putim intres bilong ol pipel i go pas na i laik kirapim politikal instabiliti long kantri.

"Oposisen i no gat sapot bilong ol arapela Memba bilong Palamen long kamapim vot i no gat bilip we ol i wok long strongim sait long kamapim.

"Em ol liklik lain tasol i wok long pairap tumas, ol i no gat namba long mekim samting stret," O'Neill i

tok. Em i tok PNC gavman i gat bikpela na strongpela sapot bilong planti memba long larim dispela gavman i pinisim 5 yia taim bilong Palamen.

"Dispela liklik grup bilong Oposisen em ol i wok long painim sans long ol yet i ken kisim benefit, ol i no putim dispela kantri na pipel i go pas," Mista O'Neill i tok.

Mista O'Neill i tok mani gavman inap long givim i go long haus sik o skul bai go long staim gen sindaun bilong Palamen.

Em i tok ol manmeri i amamas long dispela gavman bikos em i ples klia planti lida i sanap baksait long sapotim PNC gavman.

"Gavman bai go het yet na mekim gutpela wok mipela i bin statim taim mipela i kisim gavman long 4-pela yia i go pinis.

"Mipela i laik tokim ol papamama olsem gavman bilong ol i stap redi long baim skul fi bilong ol pikinini bilong ol long go skul na kisim save.

"Fri helt ke polisi bilong gavman i stap yet na dispela bai helpim planti ol famili na manmeri i kisim gutpela helt sevis taim ol i pilim sik o kisim bagarap.

"Bai mipela i mekim moa wok long kirapim ol nupela rot, bris, sip bris, ples balus, nupela klasrum, nupela haus sik na ol nupela kolis na yunivesiti long larim ol manmeri i yusim na kisim sevis," Mista O'Neill i tok.

# Dinau mani bai helpim 2016 baset

WANPELA saveman bilong ikonimi i wanbel long gavman i kisim K1 bilien (US\$500) dinau mani long wanpela biknem intanesenel benk ol i kolim Credit Suisse AG.

Paul Flanagan, husat i wanpela saveman long Australian National University (ANU), na bin wok pastaim olsem advaisa bilong Treseri Dipatmen, i tok gavman i mekim gutpela disisen long kisim dispela nupela dinau mani long Credit Suisse.

Mista Flanagan i tok dispela disisen bilong gavman long kisim dispela dinau mani em i gutpela tasol gavman i no tokaut long hamas mani em bai bekim.

"Gutpela nius, mi wanbel tasol, gavmani no tok aut hamas mani

ol bai bekim wantaim intres, olsem wanem ol bai yusim dispela mani, na sapos dispela mani em i orait long helpim mani gavman i sot long bihainim 2016 Nesenel Baset," Mista Flanagan i tok.

Ol baset pepa i tok PNG i nidim klostu long K2 bilien long helpim gavman i bihainim stret mani plen ol i mekim long 2016 Nesenel Baset.

"Aninit long baset pepa, PNG i nidim K2 bilien tasol gavman i no tok aut long olsem wane mol bai kisim dispela narapela K1 bilien," Mista Flanagan i tok.

Morobe Gavana Kelly Naru i bin askim gavman long tok aut long as bilong kisim dispela dinau mani taim PNG i gat planti dinau mani i stap yet long bekim.

Tresera Patrick Pruaitch i bin putim wanpela bikpela pablik notis long niuspepa na tok-save long kantri taim gavman i bin kisim dispela dinau mani tupela wik i go pinis.

Gavman i no tok aut yet long wanpela bikpela na hait rot so Benk ov PNG Gavana Loi Bakani na Treseri Seketeri Dairi Vele i bin mekim long London (UK), Boston (USA) na New York (USA).

Ol riopot long intanesenel media i tok dispela rot so em i bilong kamapim wanpela sovren bond dinau mani.

Mista Bakani na Mista Vele i no bin tok au tong pablik taim gavman i salim tupela i go aut long mekim dispela wok.

# Namah belat long midia

MEMBA bilong Vanimo-Green, Belden Namah, i no wanbel long sampela ol midia kampani i no givim sans long Oposisen i autim sampela gutpela toktok long ol samting i kamap long kantri.

Mista Namah i tok ol toktok bilong Oposisen i no save kamap long ol niuspepa tasol planti taim niuspepa i save putim ol toktok bilong gavman long fran pes.

Mista Namah i askim ol papa bilong midia kampani na bos bilong ol niuspepa, redio na televisen long mekim stretpela wok.

Em i tok ol i no ken larim gavman i kontrolim midia long PNG bikos dispela kantri em i demokratrik kantri, i no kantri we diketasip gavman i ranim.

"Olgeta toktok bilong gavman i stap long fran pes tasol. Mi i autim ol strongpela toktok long gutpela bilong dispela kantri tasol toktok bilong mipela i no save kam aut long niuspepa," Mista Namah i tok.

"Olgeta toktok bilong gavman i stap long fran pes tasol. Mi i autim ol strongpela toktok long gutpela bilong dispela kantri tasol toktok bilong mipela i no save kam aut long niuspepa," Mista Namah i tok.

# Oposisen bai givim toksave pepa

DEPUTI Oposisen Lida Sam Basil i tok Oposisen bai givim tok save pepa long Spika bilong Palamen long kirapim Mosen bilong Vot i No Gat Bilip egensim Praim Minista Peter O'Neill taim Palamen i sindaun gen long dispela wik.

Bihain long Suprim Kot i givim oda long Palamen mas sindaun gen namel long Tunde dispela wik na Sarere, Mista Basil bai muvim mosen bilong kirapim vot i no gat bilip egensim Mista O'Neill.

Mista Basil wantaim Oposisen i makim Memba bilong Kandep Don Polye long kisim ples bilong Mista O'Neill na i kamap nupela praim minista.

Dispela bai namba foa taim Oposisen i muvim vot i no gat bilip long Praim Minista O'Neill, husat i bin abrusim pinis tripela traime bilong Oposisen long kamapim vot i no gat bilip.

"Mipela i traime tripela taim olgeta na Praivet Bisnis Komiti i no bin mekim stretpela disisen long larim vot i kamap.

"Taim mipela i laik kirapim vot i no gat bilip, Gavana Jeneral i wok long lusim kantri na Palamen Spika Theo Zurenuoc i kamap ekting Gavana Jeneral.

"Spika Zurenuoc i mas stap long kisim ol notis pepa. Mipela i les long dispela trik pasin i kamap," Mista Basil i tok.

Praim Minista O'Neill i wok long kisim ol edvais bilong ol loya bilong em bihain long Suprim Kot i bin tokim Palamen long sindaun gen insait long 5-pela de.

# Somare na Mekere tokim O'Neill long step daun


TUPELA senia lida i singautim Praim Minista Peter O'Neill long lusim sia na step daun.

Tupela pastaim Praim Minista Sir Michael Somare and Sir Mekere Morauta tok lidasip bilong Praim Minista O'Neill i no fit long strongim pasin bilong yuniti long kantri na em i mas step daun na lusim dispela sia.

Sir Michael na Sir Mekere i tok Mista O'Neill i mas lusim sia bilong Praim Minista bikos planti samting i bagarap, nem bilong kantri i go bagarap na pasin korapsen i kamap bikpela moa yet aninit long lidasip bilong em.

"Las faiv yia bilong lidasip bilong em i pulap long mismenesmen, westim mani na pasin korapsen long bikpela mak," Sir Michael na Sir Mekere i tok long wanpela join midia staimen.

Tupela i tok PNG i nau wok long bungim



**Tupela pastaim Praim Minista Sir Michael Somare and Sir Mekere Morauta**

bikpela hevi bilong mani i sot na ikonimi bilong kantri i go daun.

"Mista O'Neill i wok long kisim dispela kantri i go daun long rot nogut," tupela i tok.

Mista O'Neill i tok taim tupela man i bin kamap Praim Minista, ikonimi bilong dispela kantri i bin stap gut tasol taim em i kam insait, kantri i senis na i lukim planti gutpela samting i kamap.

"Dispela toktok bilong tupela i rabis toktok. Sir Mekere i bin salim planti

ol samting bilong gavman na daunim namba na sais bilong ol pablik sevan," Mista O'Neill i tok.

Mista O'Neill i tok em i mekim planti samting we Sir Michael i no bin mekim taim em i bin stap Praim Minista long planti yia.

"Insait long 4-pela yia tasol, kantri bilong yum i senis hariap. Rot na bris, fri edukesen, fr helt sevis na divelopenmen bilong ikonimi i kamap hariap tru," Mista O'Neill i tok.

**Meadow Fresh**

**Taste the Difference**

At the Right Price

100% WILLOW FRESH MILK

New Zealand pure milk full cream

CHOCO CHOC

STRAWBERRY

# Saina laikim ges bilong PNG

LEVEL bilong ikonmik, bisnis na politikel poroman namel long PNG na Saina bai gro i go moa yet taim Saina i baim moa LNG bilong PNG.

Praim Minista Peter O'Neill i tok PNG na Saina i sainim planti agrimen tasol wanpela namba wan agrimen em long larim Saina i baim moa ges bilong PNG.

Saina i save baim ges bilong PNG LNG Projek tasol em i laik baim sampela moa ges long bihain taim.

Praim Minista O'Neill i tok Saina i laik baim moa ges bilong namba tu LNG Projek bai kamap long PNG.

"Ges bilong Papua LNG Projek i mas gat maket long

salim na kisim mani. Gavman i mekim gutpela wok long painim ol maket bilong dispela namba tu LNG projek bilong PNG,"Mista O'Neill i tok.

Em i tok Saina bai baim sampela ges bilong Papua LNG Projek.

Long wankain taim, Planti ol kampani bilong Saina i wok long kam insait long PNG na tekova long maining projek.

Ol investa bilong Saina i gat sea long Porgera gol main, Frieda River Kopa projek na long bikpela nikel maining long kantri, Ramu NiCo long Madang.

# Undialu painim mani bilong Kroton Ekwiti

**NUPELA ekting Gavana bilong Hela, Philip Undialu, i putim ol papagraun na provinsal gavman bilong ol provins we PNG LNG Projek i karamapim bikos em i laik painim mani long baim 4.27 pesen Kroton Ekwiti bilong ol long dispela bikpela ges projek i kamap long PNG.**

Taim Hela Provinsal Asembli i makim dispela Memba bilong Koroba Lake Kopiago i kamap ekting Gavana bilong provins we moa long 80 pesen bilong ges bilong PNG LNG Projek i kam long en, Mista Undialu i tok namba wan wok bilong em olsem ekting gavana em long painim mani long helpim 5-pela provinsal gavman wantaim ol papagraun grup long baim dispela ekwiti.

Kumul Petroleum Holdings Limited (KPHL) nau i holim dispela 4.27 pesen ekwiti bilong ol Hides, Angore, Juha, Moran, Kutubu, Gobe, paipain, na LNG Plent.

Ol provinsal gavman bilong Hela, Westen, Sauten Hailans, Galp na Sentral tu bai gat rait aninit long UBSA agrimen ol i bin sainim long Kokopo long baim sampela sea bilong dispela ekwiti.

"Mi bai go lukim sampela kampani long Sydney, Australia long kisim mani long fainensim o baim dispela 4.27 pesen ekwiti,"Mista Undialu i tok.

Mista Undialu i tokim ol papagraun long stap isi na sapotim wok em i laik mekim long helpim ol papagrau long kisim dispela ekwiti.

"No ken harim toktok bilong sampela ol man, husat i laik giamanim yupela na stilim mani bilong mipela," Undialu i tok.

Em i tok em bai mekim ol gutpela wok pastaim Gavana Anderson Agiru i bin lusim taim em i dai.

"Ol wok bilong painim dispela mani we Gavana Agiru i bin mekim na lusim, nau i stap long han bilong mi. Mi laik askim ol papagraun na 5-pela provinsal gavman long sapotim mi long dispela bikpela wok,"Mista Undialu i tok.

Detlain bilong baim dispela ekwiti i bin pinis long Jun 30 tasol Nesenel Eksektiv Kaunsil (NEC) i surukim dispela det i go moa long Septemba long dispela yia.

"Gavman i helpim yumi taim em i surukim dispela

det. Yumi mas painim dispela mani hariap na baim ekwiti,"Mista Undialu i tok.

Em i tok narapela bikpela wok i stap long han bilong em, em long skelim ol benefit bilong PNG LNG Projek namel long Hela na Sauten Hailans Provinsal (SHP) Gavman.

Olgeta benefit bilong PNG LNG Projek nau i stap aninit yet long SHP gavman bikos taim ol i bin sainim UBSA agrimen long statim dispela ges projek long yia 2008, Hela i no bin stap olsem wanpela provins yet.

Mista Agiru i bin toktok long skelim dispela benefit tasol em i lusim laip, na aninit long Klos 24 bilong UBSA agrimen, dispela pasin bilong skelim LNG mani i mas kamap gut tru, Undialu i tok.

## Oposisen redi long rausim O' Neill

I kam long pes 1...

Mista Polye wantaim ol Oposisen memba nau i wok long bungim ol arapela memba na stretim gen mosen pepa bilong givim tok save long kirapim dispela vot i no gat bilip.

Mista Polye i tok Praim Minista O'Neill i asua long planti samting na Oposisen i no gat bilip long em i ranim kantri.

"Mipela bai givim namba foa mosen bilong kirapim vot i no gat bilip egensim Praim Minista,"Mista Polye i tok.

Mista Polye i askim Palamen Spika Zurenuoc long kam kamap siaman bilong dispela bung na larim dispela vot i kamap.

"Mi laik askim Palamen Spika long larim dispela vot i kamap. Praim Minista i gat namba tasol larim em i testim dispela namba long plua bilong Palamen,"Mista Polye i tok.

Mista O'Neill i tok sindaun bilong Palamen long dispela taim bai westim mani bilong gavman taim kantri i nidim moa haus sik na klasrum long hepim pipel.

"Gavman i kirapim nupela klasrum bilong ol pikinini bilong yumi. Ol pipel i kisim fri helt sevis. Rot, bris, ples balus na sip bris i stap gut nau bikos gavman i putim moa mani i go insait na kirapim ol dispela namba wan samting bilong kirapim ikonimi bilong kantri,"Mista O'Neill i tok.

Em i tok Oposisen i wok long kirapim politikel instabiliti taim planti foren investa na bikpela kampani i gat bilip long gavman na i kam insait long kantri long mekim bisnis.

"Kain biknem kampani olsem ExxonMobil, Total SA na New Crest Mining i wok long invest long PNG na kamapim planti wok long helpim ol manmeri bikos ol i gat strongpela bilip long menesmen bilong ikonimi na lidasip long kantri,"Mista O'Neill i tok.

## Hela nidim strongpela lidasip

NUPELA provins bilong Hela i nidim stongpela lidasip long ranim gut dispela provins, Memba bilong Komo-Margarima Francis Potape i tok.

Mista Potape, husat i bin resis wantaim Memba bilong Koroba Lake Kopiago Philip Undialu long kisim sia we pastaim gavana Anderson Agiru i bin lusim, i tok Hela i nidim gutpela lidasip long lukautim pipel na provins.

Em i strongim sait yet olsem em i bin bihainim ol stending oda bilong provinsal asembli na ol 10-pela memba bilong provinsal asembli i makim em i kamap nupela ekting gavana bilong Hela.

"Mipela i no pait long

kisim mani bilong PNG LNG Projek. Mi na ol memba bilong provinsal asembli, husat i sapotim mi long kamap ekting gavana, i no putim mani i go pas,"Mista Potape i tok.

Mista Potape i tok em i bin pait strong long larim Hela i gat gutpela lidasip bagarap na dispela i soim olsem i no gat wanpela gutpela lidasip.

"Mipela i nidim ol lida husat i mas stap long provins na ranim haus ov asembli, ol lida husat i mas putim ol nid bilong pipel i go pas, ol lida husat i mas stap long provins wantaim pipel,"Mista Potape i tok.

Mista Undialu i tok em wantaim ol grup bilong em

i bin bihainim tu olgeta stending oda na lo bilong provinsal asembli miting na ol memba i bin makim em i kamap nupela gavana.

"Mipela i bihainim lo na mekim samting stret. 10-pela memba bilong haus ov asembli bilong Hela i makim mi kamap nupela ekting gavana,"Mista Undialu i tok.

Em i tok Mista Potape i no ken paulim ol manmeri bikos em (Undialu) i bin bihainim edvais i kam long Dipatmen ov Provinsal na Lokol Level Gavman Afes.

"Mipela i bihainim tok edvais i kam long dispela opis. Deputi Praim Minista Leo Dion wantaim ol senia opisal bilong dipatmen,"Mista Undialu i tok.

Tasol Deputi Gavana bilong Hela, Thomas Potape, i tok Asembli Klak, Watson Ebela, i no gat pawa aninit long stending oda bilong provinsal haus ov asembli long kamap siaman bilong asembli miting.

Mista Potape i tok em bai tokim PNG Lo Sosaiti long rausim wanpela loya man, husat i wok long givim edvais long ol lain bilong Mista Undialu.

Fainens Minista na Tari-Pori MP, James Marape, i sapotim Mista Undialu na i tok Memba Potape i no gavana bilong Hela.

Asembli miting we ol i makim Undialu i kamap nupela ekting gavana i bin kamap long las wik Tunde moning long Tari.

## SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

**Helen Victor**  
Owner of Zoenani Gas Ltd  
BSP Smart Business customer



WE ARE **BSP**

# Transpot sekta selebretim 10 yia



Grup foto bilong ol memba bilong TSCMIC long Julai 4 (las wik Mande) taim ol i makim 10 yia bilong wokbung

**TRANSPOT sekta i makim namba 10 yia long Julai 4 long wok bung long strongim ol wok bilong plen na karim auto l wok long wan wan sekta bilong transpot.**

Long 20 Epril 2006, Nesenel Eksekutiv Kaunsil (NEC) i bin kamapim Transpot Sekta Kodi-nesen, Monitaring na Implementesen Komiti (TSCMIC).

Dispela komiti i save wok bung wantaim olgeta transpot ejensi na ol sentral gavman ejensi long plenim na kirapim gut ol sevis long trasnspot sekta, na larim ol manmeri PNG i kisim ol benefit.

Siaman bilong TSCMIC, Roy Mumu OBE, husat i Seketeri bi-

long Dipatmen ov Transpot, i amamas long lukim dispela pasin bilong wokbung wantaim.

Long 4 July 2016, aninit long nupela tok orait i kam long NEC, TSCMIC i bin holim wanpela spesel miting long makim namba ten yia.

Seketeri Mumu i tok sampela gutpela samting i bin kamap long TSCMIC insait long dspela 10 yia.

“Wanpela bikpela samting mipela i bin mekim em i stretim baset sabmisen bilong olgeta sekta. Transpot sekta i kamap namba wan sekta long stream sekta waid baset sabmisen na nesenel gavman i wok long yusim dispela olsem standat

sabmisen long lukim ol sabmisen bilong arapela ol sekta,” Mista Mumu i tok.

TSCMIC i kamap tu olsem wanpela forum bilong transpot sekta long wok bung wantaim ol intanesenel patna olsem Gavman bilong Australia, Esian Developmen Benk na arapela ol foren patna.

Ol memba bilong TSCMIC i painim aut olsem pasin bilong wokbung wantaim ol developmen patna i bin kamapim planti gutpela samting.

I gat ol samting we ol i save wokbung wantaim olsem ol gol, plen na praioriti bilong ol trasnspot ejensi na pasin bilong wokbung wantaim long

kamapim ol dispela em i gutpela tru.

TSCMIC i save givim planti sapot long ol wan wan transpot sekta ejensi.

Seketeri Mumu i amamas long planti gutpela samting ol i mekim na em i bilip olsem bihain taim bilong TSCMIC bai gutpela tru.

“Mi lukluk go het long lukim ol yangpela lida i kisim dispela wok TSCMIC i mekim i go moa yet, na wok bung moa long kamapim seif na isipela transpot netwok sistem long PNG.

“I mas gat sampela kain koneksen long olgeta manmeri PNG long bihain taim,” Mista Mumu i tok.

## Mapai Nu Silan bai gat planti gutpela sans



Nupela logo sain bilong Mapai Transport long Nu Silan

OL wok manmeri bilong Mapai Nu Silan Limited bai gat sans long kisim planti gutpela samting bihain long Mapai Transpot i opim nupela opis bilong em long Auckland, Nu Silan.

Bisnis Developmen Menesa bilong Mapai Nu Silan Limited, Grant Wakerley, i tok dispela disisen bilong Mapai long opim nupela opis long Nu Silan.

Mista Wakerley i tok dispela invesmen bai helpim planti manmeri PNG long i go wok long Nu Silan na kisim wok ekspirens long dispela kantri.

“Mapai i gro na kamap bikpela taim em i go aut long Nu Silan, tasol narapela gutpela samting em i olsem ol wok manmeri bai gat sans long go wok long Nu Silan.

“Dispela bai helpim ol long ekspirens long wok long narapela kantri,” Mista Wakerley i tok.

## Gavman stopim protes

GAVMAN bai bihainim tupela lo long stopim ol manmeri husat i laik protes egensim Praim Minista Peter O’Neill, Sif Seketeri Isaac Lupari, i tok.



Mista Lupari ( piksa) i tok Nesenel Sekyuriti Edvaisori Komiti (NSAC) bai bihainim Intenel Sekyuriti Act na Esensial Sevis Act long stopim manmeri husat i laik kirapim protes na kamapim hevi long kantri.

Em i mekim dispela toktok bihain long loya Moses Murray na pailot Kepten James Markop i bin askim ol pablik sevan long kantri long stopim wok na protes long rausim Mista O’Neill.

Sampela manmeri i tok long katim pawa, stopim wara, stopim ran bilong balus na sip, na tokim Praim Minista O’Neill long step daun.

“Gavman bai givim tok orait long polis long yusim fos na rausim ol manmeri husat i laik kamapim hevi long kantri,” Mista Lupari i tok.

Oposisen Lida Don Polye i no bin wanbel long dispela toktok bilong Mista Lupari.

Mista Polye i tok Mista Lupari i no ken mekim ol toktok we politisen tasol inap long mekim.

“Wok bilong yu em long lukautim ol pablik sevan bilong kantri. Yu wokman nating bilong gavman, yu mas givim gutpela edvais long Praim Minista long mekim stretpela wok.

“Na no ken pilai politiks,” Mista Polye i tok.

## NDC Gavana klinim Morata maket long moning

NCD Gavana Powes Parkop i bin kirap long traipela 6-klok moning na klinim Komyuniti Hol maket long Morata 1 long Pot Mosbi long dispela wik Tunde moning.

Planti manmeri husat i laik lusim haus na go wok o go maket, i bin paul long lukim Gavana Parkop i holim rek na brum na

klinim ol pipia olsem plastik bek, buai skin, buai spat, smuk bat, na arapela ol rabis arere long maket na rot.

As tingting bilong Gavana Parkop long kam olgeta long kain ples olsem Morata na holim brum na klinim ol rabis na kainkain pipia long maket i bin mekim planti manmeri i

paul bikos ol i no bilip olsem kain man olsem em bai kam daun na klinim rabis na pipia bilong ol.

Mista Parkop i tok olsem lida bilong NCD, em i soim ol pipel long gutpela pasin long lukautim ples, klinim eria, na stap gut olsem manmeri, i no enimol.

Mista Parkop i tok Pot Mosbi i no gat wanpela risos we ol manmeri i ken salim na kisim man long lukautim famili bilong ol.

“Kapital Siti bilng yumi i no gat wanpela risos, gras na drai graun tasol i stap. No gat wara tu. Yumi no gat gol, ges, oil na kopa.

“Yumi no gat diwai long katim na salim na kisim mani. Yumi bai hat long kisim pis long solwara tu,” Mista Parkop i tok.

Em i tokim ol manmeri long senisim pasin na lukautim ples na stopim pasin raskol insait long siti bikos dispela kain pasin bai no inap helpim yumi.

“Yumi no ken pulim mobail pon o kamera bilong ol turis manmeri. Ol i kisim mani kam long yumi ken benefit.

“Yumi no ken tromoi pipia nabaut. Dispela rabis na pipia bai bagarapaim ples na o turis bai les long kam lukluk raun long kantri na siti biong yumi.

“Ol manmeri mas sevim mani na statim liklik bisnis. No ken westim mani na dring bia. Bia, buai na smuk i no gutpela samting long laip.

“Ol yangpela manmeri i no ken smukim spak brus. Mariwana i no gutpela samting, em bai bagarapim laip



NCD Gavana Powes Parkop

na bihain taim bilong ol yangpela manmeri,” Mista Parkop i tok.

Em i tok sampela kantri olsem Saina, Siapan na Inglan i no save nidim bikpela banis na sekyuriti waia long mekim bisnis tasol yumi PNG i wok long pret long yumi yet go kam na dispela kantri i no muv i go het.

“Raskol pasin i mas stop long Morata bikos dispela ples bai no inap senis sapos ol raskol i mekim stil pasin na bagarapim ol manmeri.

“Ol bisnis manmeri i stap na yumi i stap. Ol i wok long kirapim ol wok mani na yumi ken mekim wok, kisim mani na sapotim famili bilong yumi long hia,” Mista Parkop i tok.

Em i tok pasin raskol bai rausim ol investa na bisnis manmeri i go bek na ol bai les long kam mekim bisnis na givim sevis long hia.

“Ol bisnis manmeri na investa i save mekim bisnis na kamapim sans long ol manmeri i mas kisim wok. Sapos ol i les long mekim bisnis long hia, ol pipel bilong yumi bai painim hat taim,” Mista Parkop i tok.



**Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.**

**Mipela i laikim ol Eijen long distributim niuspepa long dispela ol ples antap hariap tru!**

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: 325 2500 o Mobail namba: 7384 6688 o email i kam long: seovo@wantokniuspepa.com



# PIH Saveman Nius


"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

## Experienced Interventional Cardiologist visits PNG to provide critical cardiac care

45 patients during his 6-days of consultations at PIH and performed 16 Angiograms and 2 Angioplasties.

One patient who suffered



implanted one stent successfully. There were also 8 patients who were detected to have severe triple vessel blocks in coronary angiogram and were advised coronary artery bypass surgery (CABG).

The Medical Director of PIH, Dr Amyna Sultan (OBE) said that PIH took the initiative to conduct the cardiac camp after observing that, PIH is cheaper than Australia, Philippines & Singapore while delivering the same quality of cardiac care.


She added that although the Government has not subsidized the programs she is hopeful that the Government will support this program.

PIH will soon have a Surgical Cardiac Camp for the patients who have been advised CABG and for the patients who are waiting for the surgery. The surgeries will be done at a discounted rate in order to bring affordable cardiac care in PNG and help the patients.

a massive heart attack recently and was treated in POMGEN was referred for further evaluation. His Coronary angiogram revealed 100% occlusion of major artery and 80% occlusion of other artery. He was successfully stented (angioplasty) with two stents and was discharged on the second day.

From the start of the Cath-Lab there has been zero complications in all the operations conducted, i.e. all of them have been 100% successful.

Another patient who had a



heart attack recently was

On the occasion of first Anniversary of Heart Cath Lab, PIH had invited one of PIH visiting consultants Interventional Cardiologist Dr.VineetSankhlafrom India for a special cardiac camp that was conducted from 3rd July till 9th July 2016.

To commemorate the first Anniversary of the Only Heart Cath Lab in the country PIH had offered special 40% discount on Angiogram and 20% on Angioplasty.

Dr.VineetSankhla has more



than ten years of experience in interventional cardiology.

Dr.Vineet saw more than

## Kardiolojis dokta bilong lewa i givim diskaun



Frieda Sila Kana i raitim

DOKTA Vineet em i wanpela kardiolojis, o speselis dokta bilong sik bilong lewa na em i bilong India tasol olgeta tupela mun em i save kam long PNG na wok wantaim Pasifik Intenesenel Haus sik (PIH) long stretim ol sikman husat i gat sik long lewa.

Las wik long Julai 4, i go i long Fraide Julai 8, Dokta Vineet i bin lukim moa long 30 sikman na meri, husat i gat kain kain hevi long lewa. Dokta Vineet i tok, sik bilong lewa em i wok long kamap bikpela tumas long kantri bikos long senis long ol kain kaikai ol pipel i save kaikai na tu long ol

kain samting olsem smok, dring na kaikai buai. Em i lukim olsem sik bilong lewa i wok long kisim moa ol bikpela manmeri husat i winim 45 krismas pinis. Insait long 5-pela de wok em i bin lukim tupela meri, wanpela i gat tripela rop bilong blut i go long lewa i pas olgeta. Tasol em i helpim long opim ol gen.

Em i tok, em i no wanpela sejen, o dokta husat i gat save long katim ol sikman tasol em i dokta bilong lewa olsem na em i yusim ol nupela kain teknoloji we PIH i gat long stretim ol sik olsem angiography na Cat Scan.

Dokta Vineet i gat kontrak long kam

long PIH wanpela taim insait long 2-pela mun, tasol wanem samting em i gutpela long dispela taim em olsem PIH i givim diskaun long ol lain i gat sik long lewa na i nidim dokta.

Taim planti sikman i kamap long wanpela taim em i givim gutpela sans long dokta na ol narapela helt save-man na meri husat i gat wok long helpim dispela dokta i kamap na mekim wok.

Olsem na long dispela taim ol i katim prais bilong kisim helpim i go daun 40 pesen long mani mak bilong K6,000 tasol long lukim wanpela sikman o meri. Sapos long narapela taim we planti sikman i no kamap, em bai kos

Dokta Vineet (hankais) – Kardiolojis bilong India i save kam long PIH, Port Moresby olgeta 2-pela mun. Em i toktok long ol nius ripota long las wik wantaim Jeneral Menesa bilong Maketing, Yogi Rawat na Dokta Paul Alexander, PIH Dairekta Medikal Sevis.

Poto: Frieda Sila Kana

olsem K10,000 long wanpela sikman o meri tasol.

Dokta Vineet i tokaut olsem insait long wok bilong em, wanpela yia bihain long ol i opim haus sik antap long 3-Mail maunten, ol i no bin gat bikpela hevi o man i dai long han bilong em insait long Cath Leb.

Dokta Vineet i givim tok stia moa olsem ol pipel bilong PNG i mas lain long bihainim helti laip-stail.

"Wokim blut tes, sekim mak bilong suga long bodi, sekim hat olgeta taim na bai yu ken stap helti. Kaikai gutpela kaikai na wokim ekksesais," em i tok.

Dokta Vineet i bin go bek long India long Sarere 9 Julai.



## MAKING SURGERY EASIER WITH LAPAROSCOPY

Minimally invasive surgery, the boon from medical science now at PIH

- Less pain
- Smaller cut
- Less bleeding
- Faster recovery

### Some common conditions where laparoscopy is needed:

- Gall bladder stone
- Appendicitis
- Hernia repair
- Uterine problems



Pacific International Hospital : Sec 105, Lot 2, Taurama, 3 Mile, Port Moresby, PNG, Ph : 799 88 000  
PIH Clinic : Ground Level, Vision City Mega Mall, Waigani Drive, Port Moresby, PNG, Ph : 7100 2873  
info@pihpng.com | www.pihpng.com | @pihpng | #pihpng



# Omni Faundesen givim 5-pela papi dok long polis

Frieda Sila Kana i raitim

**POLIS dok yunit long Bomana nau i gat 5-pela yangpela papi dok i gat 7-pela mun tasol, we Omni Faundesen i bin givim ol nating long las wik.**

Komisina bilong Royol Polis Kon-stebulari, Gari Baki i bin kamap long taim ol tupela lida man bilong Omni Faundesen i bin go long givim ol dok i go long polis dok yunit.

Omni Faundesen em i wanpela non-propit marimari ogenaísesen we i save helpim ol komyuniti long PNG na ol i stap long 6-Mail long Nesenel Kepital Distrik. Dispela Faundesen i save lukluk long hevi bilong edukesen, helt na pablik sefti. Olsem na long sait bilong pablik sefti Faundesen i tingting long givim dispela 5-pela German Sepet papi i go long RPNGC.

Seketeri bilong Faundesen, James Inglis i tok ol 5-pela papi em ol pikinini bilong tupela sekyuriti dok, Zeus na Hera, na tupela wantaim

i blut bilong German Sepet dok.

“Dok bilong mipela Zeus em i wanpela kain dok wantaim strong-pela kala blak na longpela gras, na em i gat 45 kilogram. Papa bilong Zeus em i wanpela dok we ol i bin yusim olsem sekyuriti dok insait long Australia Eafos.

“Dok mama bilong mipela, Hera em i wanpela gutpela dok i gat gutpela kleva tingting. Em i gat yalobraun kala na hevi bilong em i 36 kilogram. Papa bilong em i wanpela dok we ol i bin yusim long sekyuriti bilong Korektiv Sevis long Queensland, Australia,” Mista Inglis i tok.

Zeus na Hera i bin kamap long Australia we ol i bin kisim olgeta sekyuriti trening bilong ol long wanpela olpela polis dok hendla o man i save gut long trenim na wok wantaim ol polis dok.

Omni Faundesen i bin bringim ol i kam long PNG taim tupela i gat 8-pela mun na wanpela kwalifaid trainer bilong dok i lainim tupela long Pot Mosbi.



**Ol Polis dok hendla i soim tupela bilong ol papi na sanap wantaim RPNGC Komisina Gari Baki, na tupela bikman bilong Omni Faundesen, James English na Jason Kurdinsky, wantaim OIC bilong Polis Dok Yunit, Leuth Inspekta Leuth Nidung long hap bilong polis dok yunit long Bomana.**

Mista Inglis i tok, tupela dok i gat gutpela save na pasin bilong lukautim ol properti long 6-Mail inap long planti ya nau.

Olsem na em i gat bilip olsem ol papi ol i givim nau em ol i givim wantaim gutpela stori baksait na tu ol i givim fri stret wantaim olgeta bel bilong ol.

Omni Faundesen i tromoi namel long K20,000 na K25,000 long kisim wan wan bilong tupela papi long Australia i kam long PNG.


Tasol kos bilong trenim dok na lukautim em i olsem K100,000 long wan wan dok.

“Omni Limited em i wanpela liklik kampani i wok 10-pela ya pinis long kantri.

Na mipela i liklik kampani olsem i givim dispela kain mani mak bilong K100,000 i go long sekyuriti bilong komyuniti, ating ol bikipela kampani inap long mekim moa wantaim bikipela mani moa long helpim ol polis long holim gut

sekyuriti bilong pablik na komyuniti,” Mista Inglis i tok.

Omni Faundesen na Polis dok yunit bai singaut long wanpela resis bilong givim nem long ol 5-pela dok long liklik taim bihain, tasol Komisina Baki i tok em i laikim wanpela bilong ol dispela dok bai ol i givim nem bilong nara-pela polis dok we i bin dai long taim bilong ol i ranim raskol long bus long NCD sampela ya i go pinis. Nem bilong dispela polis dok we i bin dai em ‘Bani’.



## TribeFM Teen Excellence Awards 2016

### Nominate your 'Teen Hero'

*Do you know an outstanding teenager, who demonstrates leadership and resourcefulness in their community?*

The 2016 inaugural TribeFM Teen Excellence Awards will celebrate 7 teenagers from across Papua New Guinea, between the ages of 13 and 19 who have demonstrated persona, growth, leadership and a commitment to the community in which they live.

#### CATEGORIES AND CRITERIA

*The nominees must demonstrate the core values of personal growth, leadership and commitment.*

**HEALTH & WELFARE**  
For a young person dedicated to improving their own health and that of those in their community by encouraging health-focused activities in their schools, families and other community groups

**MUSIC & ARTS**  
For a young person who's shown outstanding ability in the arts and music and may have used them to effect change in their community

**SPORT**  
For a young person who's shown significant sporting dedication and achievement and may have used them to contribute to their community

**COMMUNITY**  
For a young person who's passionate about putting other people's needs first, having given up their time and energy for their community

**EDUCATION**  
For a young person who's shown significant achievement or improvement in their schooling, or someone who has a track record of supporting the learning of others

**BUSINESS & INNOVATION**  
For a young person who's innovative and demonstrated a business activity that benefits themselves and their community

**DISABILITY**  
For a young person making a difference by supporting those with a disability, including young people with a disability who are making difference to their own lives and the community

**HOW TO NOMINATE**  
Fill out this form with as much information about your nominee as possible. Incomplete forms will not be accepted.

**Entries MUST be received by 5.00pm on Friday, 22 July 2016**  
Please submit your completed form to TRIBE 92FM via one of the following ways:

- Mail to: TribeFM, NBC, PO Box 1359, Boroko, Port Moresby, PNG
- Drop in person to your nearest provincial NBC OFFICE
- Via TribeFM's Facebook page (send a photo of the completed form)
- Via Whatsapp to 7019 9105 (send a photo of the completed form)

Queries can be directed to 325 3439 between 8.30 - 4.30pm, Monday to Friday or email [wgorogo@nbc.gov.pg](mailto:wgorogo@nbc.gov.pg)

### NOMINATE YOUR 'TEEN HERO' FOR THE INAUGURAL TRIBE92FM TEEN EXCELLENCE AWARDS

Please TICK ONE of the following categories to nominate your TEEN HERO:

★ HEALTH AND WELFARE

★ EDUCATION

★ DISABILITY

★ SPORT

★ COMMUNITY

★ BUSINESS AND INNOVATION

★ MUSIC AND ARTS

**NOMINEE'S DETAILS (Teen Hero):**

Full name: \_\_\_\_\_

Address: \_\_\_\_\_

Date of Birth: \_\_\_\_\_

Contact phone number: \_\_\_\_\_

**NOMINATOR'S DETAILS:**

Full name: \_\_\_\_\_

Relationship to your Teen Hero Nominee (ie father, teacher, Church leader): \_\_\_\_\_

Address: \_\_\_\_\_

Contact phone number: \_\_\_\_\_

**On a separate page, explain in detail why your Teen Hero deserves to be recognised in this year's TTEA Awards. Attach it firmly to this nomination form.**

**You MUST include specific examples of how they have demonstrated persona, growth, leadership and commitment in the category you are nominating them for**

**Rules/Conditions of Entry:**

- Open to PNG residents
- Nominees must be aged between 13-19
- Groups/teams may be nominated
- All nominations must be accurate and original
- Final judging will be done by a panel appointed by TribeFM
- If judges find there are no suitable nominations for a category, no award will be allocated
- Finalists will be notified by phone
- Winners will receive awards/financial sponsorship which are expected to be reinvested within the category they've been awarded
- Winners' names/photos and other details will be published in the media

**Proudly supported by:**





# Ol sevis long UPNG i stop

**Charlpetson Koi i raitim**

YUNIVESITI bilong Papua Niugini (UPNG) Edministresen i pasim ol sevis bilong em bihain long stopim 2016 Akademik yia.

UPNG Ekting Sensela, Dokta Nicholas Mann, i tok ol bai pasim olgeta sevis long dispela wik long wanem, ol i bin mekim disisen long las wik Tunde long stopim Akademik yia.

Long dispela ol

sevis olsem haus bilong ol sumatin long kaikai, ol domitori o haus bilong slip, ol bilding bilong slip na ol geit bilong yunivesiti bai pas long dispela wik.

Long Tunde ol sumatin i sainim ol kliarens pepa long soim olsem olgeta propeti bilong Yunivesiti olsem ol rum ol i slip long en i stap gut.

Dokta Mann i tok, "Dispela i no olsem ol narapela taim we ol i save pasim skul taim yia i pinis. Dispela em i imejensi we ol i bai luksave

sapos sampela sumatin i no mekim kliarens.

Tasol sapos ol sumatin i bagarapim ol propeti bilong skul, bai ol i baim o karim hevi bilong en.

Dokta Mann i tok "Las de bilong mekim kliarens na lusim yunivesiti long Waigani na Taurama kempas em long Tunde long wanem em bai makim wanpela wik stret long taim Yunivesiti Kaunsil i mekim disisen long pasim 2016 skul yia.

# Momis i no amamas long Rio Tinto

**PRESIDEN bilong Atonomas Bogenvil Gavman (ABG), John Momis, i sutim tok long Nesenel Gavman olsem wok bilong painim bel isi na gutpela sindaun inap bungim hevi bihain long wanpela dil gavman i wokim wantaim bikpela maining kampani bilong Australia, Rio Tinto tupela wik i go pinis.**

Aninit long dispela dil, Rio Tinto i givim 68 pesen sea bilong en long BCL i go long ABG, tasol narapela 32 pe sen i go long PNG Gavman.

Long Jun 30, Rio Tinto i bin tokaut olsem em i givim aut sea bilong en long BCL, kampani husat i bin ranim Panguna kopa



Fr John Momis

na gol main.

Dispela dil i bin givim wankain mak long ol sea (36.4 pe sen) long mejoriti sea holding i go long PNG Gavman na ABG wantaim.

Ol ripot i tok dispela i

no bihainim bikpela laik bilong Bogenvil gavman husat i laik kontrolim intres bilong main.

Presiden Momis husat i no amamas stret long dispela dil na em i tok i no bihainim ol toktok em i gat wantaim Praim Minista, Peter O'Neill.

Long ol dispela toktok, Mista O'Neill i tokim

Presiden Momis olsem em i no toktok o bung wantaim ol bikman bilong Rio Tinto long toktok long ol samting i sut long ol kampani sea.

Bihain taim bilong Pan-

guna Main i samting we ol pipel long ailan i no mekim toktok long en na ol i stap isi tasol.

Presiden Momis i tok Gavman bilong PNG i wok long putim wok bilong painim gutpela sindaun long Bogenvil long hevi taim em i no kamaples klia long ol toktok em i wokim wantaim Rio Tinto.

Em i tok Bogenvil Pis Agrimen em dispela dokumen we tupela sait, PNG Gavman na ABG, i mas wok aninit long en, tasol dispela pasin i kamap nau i no gutpela.

Wantok i no bin inap long kisim toktok long BCL na kisim ol tingting bilong em.

# Gutnius Lutheran Kristen i bung

**Ale Asa i ratim**

LAS Fraide i bin lukim moa long 4000 Kristen bilong Gutnius Lutheran sios i bung long enuel yut konprens long Irelya viles long Wabag.

Yut Kodineta na spika bilong sios, Jeffers Kapik, i tok dispela bung i bin kamap long wanpela wik olgeta wantaim gutpela skul bilong spirituel na gutpela sindaun wantaim.

Em i tok ol Kristen i

mas kisim gutpela skul long spirituel na bodi tu wantaim long mekim ol i kamap strongpela Kristen tru long tupela sait wantaim.

Kapik i tok Gutnius Lutheran Sos i bin bungim hevi we sios i bruk long yia 1990 na hevi i stap yet i kam nau.

"Gutnius Lutheran sios i bin bruk i go tupela hap, Gutnius Lutheran Sios na Rifom Gutnius Lutheran

Church," em tok.

Kapik i tok tupela bisop i kisim dispela hevi i go long Suprim Kot we tripela jas i wokim disisen long win bilong pastaim Bisop David Piso het bilong Gutnius Lutheran sios ov PNG.

Kapik i tok long gutpela bilong sios, tupela sios lida i kisim dispela i kam long midiesen na rikonsiliesen

Spika i tok dispela bruk pasin i kamap insait long sios bikos

long spirituel rifom o bruk daun, hangre long pawa o lidasip na edministretiv wok wantaim mani.

"Dispela hevi em God Papa husat i wokim heven na graun tasol i save, na mipela i pre bai em i ken bungim yumi kamap wan gen," Kapik i tok.

Long dispela bung tu ol i dediketim Enga Teachers College, Irelya Institute of Business Studies na Irelya Primary school.



**REDI LONG STATIM LOTU PROSESIO:** INSAIT long ol komyuniti bilong yumi tude, i mas gat sampela lain i stap wantaim tingting long skruim wok bilong Bikpela. Olsem 4-pela yangpela meri long novisiet bilong ol MSC Sister long Vunapope Katolik Asdaiosis long Kokopo, Is Nu Briten i bin wokim namba wan promis long go insait long Rilijes laip long las wik Fonde. Hia em ol arapela Sister husat i bin danis long prosesio bilong kisim ol Sister i go insait long statim lotu. *Poto: Sister Daisy Lisania msc*



**Bisop David Piso na kongrgesen long Irelya bung, Wabag long Enga provins long las Fraide.**  
*Poto: Ale Asa*

# Air Niugini i mekim ran long Lae

**Charlpetson Koi i raitim**

OL Air Niugini raun bilong balus i go insait na kam ausait long Nadzab ples balus i orait gen bihain long ol balus i no bin raun long Sande.

Ekting Sif Eksektiv Opisa bilong Air Niugini, Marco McConnell i tok ol dispela hevi i kamap long Sande long raun bilong balus em i no long ol tok win i raun long sosel midia long dispela al-timetum ol i givim long Praim Minista long risain insait long 48 awa.

Mista McConnell i tok, "Raun bilong balus i go

long Lae i stop bikos sampela teknikel hevi i kamap long ol balus bilong mipela tasol mipela i lukluk long dispela hevi.

"Long Lae flait 106 na 107 mipela i plen long 3.7.3 na mipela i bilip olsem dispela de (Tunde) bai mipela kliaim tasol ol sevis bilong mipela i kam bek gen long wanem mipela bai orait nau. Tasol, dispela i no kamap bikos long ol kain kain toktok long sosel midia," Mista McMonnel i tok.

Long wankain taim, Siaman bilong Air Niugini, Sir Fredrick Feiher i tok dispela kain ol hevi i

distebim raun bilong balus i no isi long abrusim bikos long ol bikpela sefti stended we Air Niugini i save bihainim.

Tasol, ol pasindia long Lae i tok ol woklain long Nadzab ples balus i tokim ol olsem balus no inap ran bikos long draipela ren long Sande inap nau.

Ol pasindia i no wanbel na ol i kros bikos sampela i no gat hap long slip na tu ol i slip wantaim ol wantok.

Long tude ol Air Niugini balus i mekim namba wan raun ausait long Lae.

# V-Sken Pailot Progrem long Enga

Lukim ol dispela poto long Enga Provins taim ol Tribal Foundation na GE i bin go givim nupela kar na ol V-Sken masin bilong sekim ol mama. Dispela V-Sken masin em i liklik na isi tru long ol dokta na nes long mekim wok bilong ol taim ol i raun long ol liklik ples. Dispela liklik masin em GE na Tribal Foundation i givim long ol haus sik long Enga

provins long stat bilong dispela yia. Ol dokta na nes long ol dispela haus sik long Enga i bin amamas tru long GE na Tribal Foundation wantaim Gavana, Peter Ipatas, long kamapim dispela bikpela helpim long mekim wok bilong ol i isi.

Michelle Hau'ofa bilong Tribal Foundation i lukluk long nupela kar ol givim long mekim wok bilong V-Sken projek.



Sista Jadwiqa i soim Michelle (PNGTF) wantaim Peter Loko, menesa bilong GEPNG, long ol rekot bilong V-Sken.



Dokta bilong Yampu Katolik Haus Sik i sekim wanpela bel mama wantaim V-Sken masin.



Dokta bilong Yampu Katolik Haus sik i tok tenkyu long Michelle Hau'ofa na Peter Loko long bringim dispela V-Sken masin long mekim wok bilong ol i isi.

## Taim bilong painim planti wina

### Solomon Jerram i raitim

YUT redio stesen, Tribe 92FM i kisim planti handet nominesen fom bilong namba wan TribeFM Teen Ekselens Awot. Tasol ol i askim ol pipel long salim planti moa nominesen fom i kam bipo long taim bai pinis long wanpela wik bihain.

Long sampela wik i go pinis, i bin gat planti toktok i kamap long ol awot olsem wanpela pletfom bilong luksave long 'Teen Heros o ol Yangpela Wina' i stap nabaut insait long Papua Niugini.

Moa long 300 fom i bin go aut long wanpela bung long Visen Siti Mega Mol long Pot Mosbi, long wiken na ol lain i raun long ol stua i soim bikpela laik long luksave long ol Teen Hero insait long laip bilong ol.

Ol nominesen fom tu i kam long olgeta hap bilong kantri, sampela long Wes Nu Briten Provins tu.



Planti lain i go baim samting long ol stua long Visen Siti i go lukluk long TribeFM kaunta long nominetim Yangpela Winman na winmeri bilong ol.

Ol papa na mama bilong Joe Lynton Vareo husat i gat 17 krismas na i skul long Hoskins Sekenderi Hai Skul long Kimbe i nominetim em bikos ol i bilip olsem em i wanpela gutpela man. "Em i no save dring bia, smok, kaikai buai stat long taim em i liklik yet inap nau em i kamap yangpela man, em i winman bilong mi," Mama Regina i raitim olsem.



Joe Lynton Vareo i gat 17 krismas i bilong Kimbe na ol papamama bilong em yet i nominetim em long gutpela pasin bilong em.

Em i wok long helpim olgeta hap bilong komyuniti.

"Em i laik bilong em yet long stap fri long drag na em i save wok isi isi tasol long helpim ol wanlain bilong em na ol pren long kamap fri." Mama Regina i tok.

Tribe FM em i yut redio stesen bilong Nesanel Brodcasting Kopresen. Em i laikim ol papamama, was papa, was mama, komyuniti na re-

lijes lida bilong olgeta hap bilong PNG long luksave na givim nem bilong ol yangpela win man na win meri na nominetim ol long resis bilong Tribe Teen Ekselens Awot.

TribeFM Eksekutiv Produsa, William Gorogo i tok em i gutpela long lukim planti strongpela nominesen i kam pinis.

"Em i gutpela long lukim ol pipel long komyuniti i laik luksave long ol yangpela husat i laik mekim gutpela wok long laip bilong ol," Mista Gorogo i tok.

Nem bilong ol wina bilong Tribe Teen Ekselens Awot bai kamaut long Ogas 21, na em bai makim namba wan taim bilong Tribe FM 24/7 wok na tu long wok wantaim Intenesenel De bilong Yut selebren long Sir John Guise Stadium long Pot Mosbi.

Dispela Awot bai luksave long 7-pela Teen Heroes o yangpela winman na wimeri, wanpela long wan wan kategori bilong Helt na Welfe,

Disabiliti, Komyuniti, Musik na Ats, Bisnis na Inovesen na Spot.

Mista Gorogo i laikim planti pipel i mas salim ol nominesen fom bilong ol i kam hariap.

"Ol nominesen bai pas long Julai 22 olsem na mipela i laik tokim ol lain husat i laik salim nominesen i kam mas hariap long mekim, nogut bai ol i abrusim taim," em i tok.

Ol nominesen fom i stap long Nesanel Niuspepa long ol Tunde na Fonde na long Wantok Niuspepa olgeta Fonde. Ol i stap tu long ol provinsal stesen bilong NBC, na tu long NBC hetkwota long 5 Mail, Pot Mosbi.

Lukim pes 2 na pes 6 long Tribe Fm Nominesen tok kliia long kamap wina ...



# OI UPNG sumatin i gat asua

# Edukesen minista i no wanbel long UPNG kaunsil

**Frieda Sila Kana i raitim**

MINISTA bilong Edukesen, Nick Kuman i tok ol sumatin bilong Yunivesiti bilong PNG, i asua long karim straik i go longpela taim tumas na em i mekim UPNG skul kaunsil long pasim 2016 skul yia.

“Bilong wanem ol i no tingting long skul bilong ol na long ol hatwok bilong papa na mama na ol i mekim kain straik olsem. Ol i straik longpela taim tumas na nau ol i bagarapim edukesen bilong olyet,” Mista Kuman i tok.

Mista Kuman i tok, em i wanbel wantaim toktok bilong Enga Gavana, Sir Peter Ipatas, olsem ol sumatin i mas wokim pait we em i gutpela bilong ol yet na long dispela nesen, tasol yu mas wokim gut bikos dispela gavman insait long 4-pela yia em i mekim planti bikipela samting we yu ken lukim long ai.

“Mipela putim planti milien kina i go insait long olgeta 89 distrik long kantri. Yu lukim ol rot i kamap long olgeta distrik na yu lukim ol klasrum i sanap na yu lukim ol helt senta i kirap insait long olgeta kona bilong dispela kantri. Yu lukim Pot Mosbi na Lae i senis wantiam ol bikipela infrastraksa insait long 3-pela yia. Em i min olsem dispela gavman em i mekim trupela wok kamap na mipela i wok hat tru long kamapim senis. Yu mas bilip long ol lida bilong yu na bilip long gavman bilong yu.

“Yu ting husat moa bai kam na helpim yu? Oposisen i no inap mekim bikos ol i no gat inap namba. Ol i no gat strong long kamapim lidasip we mipela i givim yu nau. Insait long 40 yia bilong independens, olsem long yia 2005, K8 bilien mani we ol i bin putim long wanpela tras akaun em i lus nating.

Mipela i no save em i go we. Mi bin stap olsem wanpela minista long dispela taim. Mipela i no save dispela mani i go long we? Em i no go long wok bilong kamapim ol rot, i no gat haus i kirap, ol i no putim long ol yunivesiti long skul yu!

“Nau yupela lukim wanem kain hevi yupela i kamapim. yupela bagarapim ekedemik laip bilong yupela yet.

“Yupela i gat dinau long papa na mama bilong yupela, na long dispela kantri tu. Dispela gavman tasol i givim sans long ol rurel populesen bilong yumi. Dispela K8 bilien i no bin go insait long ol 89 distrik bipo na tu mipela i no save em i go we? Tasol mipela i go kisim dinau, yes, na gavman i traime long yusim olgeta mani em i gat long givim edukesen long olgeta Papua Niugini sitisen. Dispela em i namba wan prairiti bilong Praim MInista bilong Papua Niugini, Peter O’Neill na gavman bilong en.

“Mi no save, bilong wanem na ol sumatin long yunivesiti na ol haia institusen i wok long kamapim ol grup long ol wan wan traibel grup na provins bilong ol. Yunivesiti em i hap we olgeta kalsa grup bai wok bung wantaim. Yumi mas no ken gat ol provinsal grup na yumi mas no ken gat ol kalsa grup long ol hai institusen olsem.

“Yupela laik promotim wanem samting? Aidentiti bilong yupela? Yumi olgeta i bilong Papua Niugini, yu mas gat bilip long yu yet na long ol lida bilong kantri bilong yu. Mi singaut long UPNG kaunsil long tingting gen long disisen yupela i mekim pinis. Planti sumatin aste i bin luk sori taim bihain long pres konpres. Yu ken lukim long ai bilong ol na i luk olsem ol i laik go bek long skul stret,” Mista Kuman i tok.

**Frieda Sila Kana i raitim**

MINISTA bilong Edukesen, Nick Kuman i bin autim bel hevi bilong em long Yunivesiti bilong Papua Niugini Kaunsil long disisen ol i mekim long pasim skul yia bilong 2016 we ol sumatin bai i no inap long sindaun moa long ol klas na kisim skul.

Em i tok kabinet i wok long mekim sampela toktok long traime stretim hevi bilong UPNG, na long yunivesiti bilong Teknologi long Lae na long Yunivesiti bilong Goroka, olsem na disisen ol kaunsil i mekim hariap tumas long pasim skul em i no gutpela.

Em i tok wok bilong ranim ol yunivesiti i stap long han bilong ol kaunsil bilong tripela yunivesiti bilong gavman.



MINISTA bilong Edukesen, Nick Kuman

“Mipela i laik lukautim laip bilong ol bikipela lain sumatin insait long ol dispela yunivesiti na mipela i laikim ol kefiu bai stap long ol dispela yunivesiti long bringim gutpela taim i kam bek gen.

Tasol UPNG kaunsil i hariap tumas bihainim tingting bilong ol yet, na mekim disisen long pasim skul long 2016 skul yia.

Dispela disisen bai bringim kain kain hevi long ol yunivesiti taim skul i stat gen long

yia 2017 wantaim ol nupela fes yia long go insait long yunvesiti. Mipela bai salim 200,000 sumatin long sindaun long ol eksam long yia 2016, olsem na mi wok long tingting long ol skul liva we bai kam aut long sistem long wokim fes yia long yunvesiti long 2017 tu.

“Sapos kaunsil i bin tingting long dispela hevi bai kamap wantaim ol fes yia sumatin bilong 2016 na bilong 2017 na mekim disisen bilong ol long UPNG, em bai gutpela.

Mi ting olsem mipela bai inap long sevim 2016 ekedemik yia. Praim Minista i autim tingting bilong em pinis na olsem minsita bilong edukesen long kantri, mi tingting long wanem kain hevi bai kamap long ol fes yia sumatin bilong dispela yia,” Mista Kuman i tok.

“Olsem Minista bilong edukesen, mi bai pait i go insait long NEC level long dispela institusen i mas larim ol sumatin long mekim skul yet. Maski sapos ol bai skul long Disemba i go long Januari 2017.

“Gavman bai painim mani long baim ol ekspatriet opisa husat i stap long kontrak. Em long lari ol sumatin i mas pinisim gut skul bilong ol.

“Long dispela as mipela putim kefiu long tupela yunivesiti long kantri. Mi no amamas tru long wanem disisen ol kaunsil i bin mekim.

“Yunivesiti bilong Goroka na Yunivesiti bilong Teknologi i wanbel long go bek long ol klas na wanem kain hevi bilong UPNG?

Ol paia i no kisim ol haus bilong ranim skul! Mi singaut long yunivesiti bilong PNG long opim ol dua bilong ol sumatin long dispela kantri bai go bek skul gen.” Mista Kuman i tok.

## Nesanel entem wantaim kala na eksen

**Loutova Siapea i raitim**

NESENEL entem em i lewa song bilong yumi ol lain Papua Niugini, long wanem, em i save kamapim stret amamas na bel kirap bilong yumi.

Olsem na long planti skul, ol sumatin i wok long kamapim nau planti kainkain stail na kala long taim ol i save kamap long skul o long ol bikipela bung na seremoni.

Ol sumatin bilong Asaro Praimeri Skul



Ol sumatin bilong Asaro Praimeri skul wantaim wanpela tisa bilong ol i singim nesanel entem long taim ol i opim nupela rurel haus sik long Asaro, Isten Hailans. Foto: Loutova Siapea

long Isten Hailans wantaim wanpela tisa bilong ol i bin redi gut tru long singim nesanel enten long opening ser-

emoni bilong nupela rurel haus sik em Korea Intanesenel Koporesen Ejensi (KOICA) i bin givim olsem

wanpela presen i go long ol pipel bilong Asaro na Daulo distrik tupela wik i go pinis.

# Nupela skul registresen polisi i redi pinis

MINISTA bilong Edukesen, Hon. Nick Kuman i tok aut long wanpela polisi dokumen bilong Dipatmen bilong Edukesen long Skul Registresen Polisi na Prosida o wei bilong mekim wok, i kamap pinis na kisim tok orait long ol i bihainim insait long dispela yia.

Minista i tok olsem skul registresen polisi na prosida i kamap bikos Dipatmen bilong Edukesen i lukim planti skul i wok long kirap aninit

long ol edukesen atoriti na ol narapela lain husat i gat laik long kirapim skul tasol nating, nating na i no bihainim wanpela plen.

Ol dispela skul i wok long kisim ol sumatin na kisim ol tisa long wok, tasol ol i no wari long wanem hevi ol i wok long kamapim long laip bilong ol sumatin na ol tisa.

Ol Provinsal Edkesen Edvaisa, ol Distrik Edukesen Edministreta, Bod ov Menesmen, Bod ov Gavana

Kaunsil na ol narapel alain husat i gat laik long wok wantaim edukesen i mas kam wantaim na sapatim wok bilong Skul Registresen Polisi na Prosida.

Skul Registresen Polisi na Prosida bai givim stia long ol edukesen opisa na ol atoriti, ol political na burokret het bilong nesanel na sab-nesanel level na edukesen ejensi wantaim standet mak bilong

kamapim ol nupela edukesenel institusen insait long kantri.

“Skul Registresen Polisi na Prosida bai isi long bihainim na em i klia long helpim ol stekholda husat i laik rejistaim ol nupela skul wantaim Nesanel Eduksen Sistem. Sapos wanpela lain grup i no bihainim dispela polisi, em bai skul bilong ol i no inap kisim luksave bilong registresen.” Minista i tok klia.

Wanpela bikipela toksave pepa bai kam long opis bilong Seketeri i go long ol provinsal atoriti long wokim dispela polisi.

“Olgeta edukesen atoriti na ol stekholda i mas sapatim wok bilong dispela polisi pepa long strongim wok bilong dipatmen long kamapim gutpela standet bilong edukesen sistem,” Mista Kuman i tok.



# Helt Dipatmen i luksave long Lutheran Skul ov Nesing

James G. Kila i raitim

**LUTERAN Skul ov Nesing (LSON) long Madang i kisim bikpela luksave i kam long gavman taim ol i opim ol wok developmen we Nesenel Gavman i givim wantaim mani long mak bilong K2.8 milien. Ol opisa bilong Nesenel Dipatmen ov Helt i bin go long taim ol i opim ol nupela projek. Nupela projek bilong 2016 em long stretim haus slip bilong ol man sumatin.**

Gavman i givim mani long wokim 12-pela haus slip bilong ol wokman bilong LSON na tu 6-pela haus slip bilong ol sumatin ausait long ol ples we ol bai go wokim prektikol wok bilong ol.

Tupela haus slip bilong ol man sumatin bai stap long Yagaum helt senta, tupela long Alexishafen helt senta na tupela long Gaubin helt senta, Karkar ailan. Olgeta helt senta i stap long Madang Provins yet.

Prinsipal bilong LSON, Vitus Amugar i givim bikpela tok tenkyu bilong em makim skul na bod na Lutheran Helt Sevises long Nesenel Gavman i givim helpim long ol. Deputi Seketeri bilong Nesenel

Dipatmen bilong Helt, Elvar Lionel i givim bikpela tok amamas bilong em long gutpela menesmen bilong LSON long mani gavman i givim ol long wokim kamap ol dispela infrastraksa long wok na operesen bilong LSON.

Misis Lionel i tok em i amamas tu long Kristen Helt Sevises (CHS) long gutpela wok ol i save wokim long trenim na redim ol wokman meri long medikol wok bilong go aut na wok long planti rurel ples insait long kantri.

Em i tok Nesenel Helt Dipatmen i amamas long wok patnasip wantaim CHS long trenim ol fran lain medikol na helt fil.

Misis Lionel i tokaut tu olsem nau yet PNG i sot tru long ol medikol wokman meri long mak olsem 13,000 i go 14,000.

Em i tok olsem namba bilong ol manmeri long kisim sevis long wanpela helt o medikol wokman meri i go daun tru.

Olsem na em i tok, NDoH i amamas long dispela spesel patnasip o wok bung wantaim CHS na ol sios trening skul long wok bilong kamapim ol komyuniti helt woka na nes.



Luteran Skul ov Nesing long Madang gat luksave long gavman. Foto: James G. Kila

## Goroka Provinsal haus sik i develop yet

Loutova Siapea i raitim

kamapim bikpela infrastraksa developmen.

sel gavman na ol ovasis patna na sapota.

Projek bilong dispela developmen em i bikpela tru we i win manimak olsem tu handret milien kina (K200 milien), mani we i kam long nesenel na provin-

Taim dispela projek pinis bai em i givim namba wan sevis i go long ol man, meri na pikinini bilong Isten Hailans na ol arapela provins tu.

BIKPELA haus sik long Goroka, Isten Hailans, i save givim helt sevis i go long moa long handret tausen (600,000) pipel i wok long



Ekting Sif Eksekutiv Opisa bilong Isten Hailans Provinsal Helt Atoriti, Joshua Soso i toktok wantaim ol ges husat i bin kamap long lukluk raun long ol graun wok bilong nupela Goroka Provinsal Haus sik we i stat las wik na i go het nau. Dispela K2milien projek bai pinis long yia 2019. Foto: Loutova Siapea

## K4 milien bilong stretim Kira Kira klinik

Frieda Sila Kana i raitim

POT Mosbi Saut Ilektoret i lukim gen narapela brukim graun seremoni bilong kirapim wok bilong stretim olpela Kira Kira klinik i go kamap olsem wanpela helt senta bilong lukautim 50,000 pipel i stap long dispela ilektoret.

Dispela brukim graun seremoni i bin kamap insait long banis bilong Kira Kira helt klinik long Tunde dispela wik, we Rijinol Memba na Gavana bilong Nesenel Kepital Distrik, Powes Parkop i bin draivim wanpela bako masin long makim graun. Mista Parkop i bin bihainim singaut bilong lokol memba na Minista bilong Spot na Nesenel Ivens, Justin Tkatchenko long putim kauntapat fanding bilong gavman wantaim Distrik Sevis Impruvmen Program (DSIP) mani bilong Pot Mosbi Saut long kirapim dispela wok.

Minista Tkatchenko i putim K2 milien aninit long DSIP fan na Gavana Parkop i makim wantaim wankain mak bilong K2 milien long mekim olgeta wok bilong stretim dispela



Olpela Kira Kira klinik haus em i gat 30 krismas pinis na nau bai kisim helpim. Foto: Nicky Bernard.

klinik. Wok bilong kamapim disain bilong klinik i bin kisim 7-pela mun olgeta.

Minista Tkatchenko i tok, Kira Kira klinik em i bin stap 30 krismas olgeta na i no bin gat wanpela senis long en inap taim em i bin kamap memba na em i putim wanpela ain banis long sekuriti bilong klinik inap nau dispela nupela developmen i kamap.

Em i tok sik Tubekula em i wanpela bikpela sik we i save kilim i dai planti pipel long Pot Mosbi, tasol bikpela namba tru em i save kam long ol pipel bilong Pot Mosbi Saut. Em i tok ripot bilong Opisa In Sas long Kira

Kira klinik i tok olsem long yia 2015 Kira Kira klinik i bin gat rekot olsem 396 TB sik pipel i save stap long marasin.

"Mi save kisim singaut long helpim 50 haus kraik long wan wan mun na hap namba bilong ol dispela haus kraik em ol pipel we i save dai wantaim sik TB. Minista i tok wantaim dispela kain namba, em i lukim olsem samting olsem 3,000 pipel i save dai long ilektoret bilong em long wan wan yia na samting olsem 2000 em ol i dai long sik TB.

"Ol pipel bilong Kira Kira na ol narapela ples klostu i mas senisim pasin bilong yupela.


Stap gut, kaikai gut, lukautim yupela yet na bai yupela i stap longpela taim," Minista Tkatchenko i tok.

Minista Tkatchenko i tok, ol wok bilong stretim haus sik bai pinis long mun Desemba. Em i tok tenkyu long Gavana Parkop long em i save helpim em wantaim kauntapat mani long klostu olgeta distrik projek bilong memba long ilektoret bilong en insait long 4-pela yia nau.

Em i tok tenkyu tu long Foaskwea Living Lait Sios Helt Sevis long gutpela wok bilong ol long ranim ol wok long dispela klinik na long Kaugere helt senta we ol i bin opim las yia.

# Laip bilong sevis long wok bilong sios

**LONG Sarere 25 Jun, ol famili wantaim ol pren bilong mama Mary Taita Erico i bin bung na selebretim spesel lotu bilong tok tenkyu na luksave long wok bilong mama Erico long helpim Katolik sios inap 46 yia olgeta.**



Mary Taita Erico

Mama Erico i ritaia nau long mekim wok bilong lukautim ol misineri na wok bilong Komunio Minista long St Peter Chanel Peris, Erima long Nesenel Kepital Distrik.

Mama Erico i gat 79 krismas nau. Mama i bin karim em long 13 Jun, 1937. Em i bilong Delena long Kairuku, Sentral provins.

Stori bilong mama Erico na wok bilong em i stat long taim Fr Allan Reis, MSC wantaim ol Brigidine sister bilong Melbourne Australia, i kamap long Erima long 1969 na kirapim misin stesin. Long dispela taim, i no bin gat planti haus na pipel long Erima/Gordons eria.

Mama Erico na man bilong em Valea Lui Erico i bin stap long Spoonbill Drive na wan-

pela de Pater Reis wantaim Sister Maurus i bungim ol na askim ol long tok save long ol narapela Katolik olsem bai i gat wanpela skul na sios i kamap long dispela eria. Ol i harim na ol i tok save long ol Katolik na ol arapela manmeri tu long komyuniti. Ol pipel i bin amamas long taim ol i harim olsem bai gat praimer skul i kamap long Erima na ol tu i kam givim han long sanapim ol klasrum. Ol i wari long ol pikinini i save go longwe tru long skul long ol arapela hap bilong siti.

Orait long 1970 misin i kirapim St Peter Chanel peris na wanpela praimer skul. I no gat planti klasrum na haus lotu i no redi yet olsem na Pater Reis i save wokim misa long wanpela klasrum. Ol namba wan peris kaunsel memba em Valea Lui Erico na Tom Barry Maguna.

Long 1974, ol i sanapim haus lotu antap long maunten klostu long haus bilong ol Brigidine sister. Na long 1975, ol Brigidine sister i statim Maino Heduru Vokesenel Senta.

Mama Erico i stat wok olsem klina long haus bilong ol misineri pater na sister long taim em i gat 33 krismas. Man bilong em Lui, i bin dai long 1980 na lusim em wantaim 6-pela liklik pikinini long lukautim. Pikinini bilong em Vivianne i tok, mama i save tokim ol olsem: "Mi laikim God, na bai mi sevim em long wok misin long lukautim yupela, na bai mi lukautim tu ol misineri husat i lusim kantri bilong ol na kam wok wantaim yumi. Mi mekim ol dispela wok bai God i blesim laip bilong yumi."


Insait long dispela 46 yia, mama Erico i bin lukautim haus bilong olgeta pater husat i bin stap long Erima na ol Brigidine sister long Erima na Hohola na ol arapela SVD pater long SVD Koles long Bomanana. Em i wanpela Lijon mama na i stap insait long mama grup bilong peris.

Long 2002, Gavman i luksave long wok bilong em long sios na komyuniti na i givim em British

Empire Medal. I bin gat wanpela bung kaikai i kamap bihain long misa na ol famili na Erima peris wantaim i wokim bikpela kaikai tru. Ol pikinini na wanwok bilong ol i baim ol kek, pikinini na kukim kaikai bilong dispela bung. Ol lain i makim ol SVD misineri, ol famili na pren i bin mekim sampela toktok na givim ol presen long mama Erico.

I tru olsem mama Erico i ritaia nau. Tasol i luk olsem em bai i no inap lusim wok sapos em i lukim olsem ol samting i no stret. Las wik Sarere mi lukim em i holim brum na lindaun long brumim ol lip arere long haus pater. Mi go tok halo long em na askim watpo em i no pret long draipela san na das, na em i bekim olsem, "Em ol liklik samting. Tumora em Sande na banis bilong pater i mas stap klin."

Tru tumas, dispela naispela mama em i soim gutpela piksa bilong daun pasin na pasin bilong givim sevis long ol arapela.



## GOD I STAP KLOSTU

Sampela taim yumi no inap lukim samting i stap klostu long yumi na yumi painim em. I gat wanpela fani stori i bin kamap long mi yet. Em i bin kamap long taim mi bin stap long Erima Peris long Pot Mosbi.

Wanpela moning, mi bin painim aiglas bilong mi. Mi i no lukim antap long rum bilong mi. Mi go aut long siting rum. Mi no bin lukim long siting rum, mi go painim long toilet na sawa rum. Bihain mi go long olgeta rum i stap antap long plua namba tu. Tasol wok bilong mi i popaia nating. Mi no painim aiglas bilong mi.

Bihain mi go daun na painim long beis plua long liklik Chapel, opis, kitsen na toilet na sawa rum i stap long namba wan plua. Mi no painim em. Mi go bek na painim antap long namba tu plua gen. Tasol mi no painim.

Mi wokabaut go daun long step na laik kisim ki bilong haus lotu na go long lukim long haus lotu. Long wankain taim, wantok bilong mi i bin stap holide wantaim mi i askim mi. Em i bin lukim mi go antap na daun long painim samting. Olsem na em i askim mi: "Pater! Yu painim wanem samting?"

Mi stop na bekim tok bilong em. "Mi painim aiglas bilong mi a! Mi no save, mi bin putim long wanem hap nau? Ating mi lusim tingting long haus lotu o? Bai mi go daun long haus lotu na kisim."

Taim wantok bilong mi i harim olsem mi painim aiglas bilong mi, em i lap bikpela tru na lap nogut tru. Mi belhat long em na tok; "Olsem wanem? Ating Yu haitim aiglas bilong mi a? Em i stap we?"

Em i lap bikpela moa moa yet na i tok: "Yu longlong pinis a?" Mi belhat na tokim em: "Nogat! Mi no longlong. Mi laik ritim niuspepa na mi painim aiglas bilong mi."

Na em i tok: "Wanem samting i stap long ai bilong yu? Nau yu karim aiglas long ai bilong yu na yu painim em long olgeta hap. Em i stap long ai bilong yu ya?"


Nau belhat bilong mi i lus olgeta. Mitupela i lap bikpela moa moa yet. Bikos aiglas bilong mi i stap long ai bilong mi yet tasol mi painim em long narapela ples.

Long Sande, 10 Julai 2016, yumi bin ritim Buk bilong Lo (Ditronomi) 30: 10 – 14. Dispela hap bilong Baibel i tok strong long yumi olsem God i stap klostu long yumi. Em i stap long Buk Baibel na em i save toktok wantaim yumi olgeta taim yumi ritim Baibel. **"Dispela Tok i no stap antap long skai. Na yupela i no inap askim husat bai go antap na bringim lo i kam daun, bai mipela i ken harim na bihainim? Na dispel lo i no stap long hapsait bilong solwara. Olsem na yupela i no inap askim, 'Husat bai go long hapsait na bringim i kam, bai mipela i ken harim na bihainim?'"**

Dispela hap bilong Baibel i helpim yumi long tingim bek olsem God i no stap longwe long yumi. Em i save stap klostu wantaim yumi na em i stap insait long yumi yet bikos em i bin mekim yumi olsem piksa bilong em yet.



Asbisop John Ribat i sekan wantaim mama Erico long taim em i kam givim sakramen bilong konfemasio long mun Jun long St Peter Chanel Peris.



Fr Freddy, Fr Paul Liwun na Fr Marsianus Bei i pre na blesim mama Erico.



Mama Erico i katim kek.



Sampela mama bilong peris i sanap wantaim mama Erico

# Palamen i mas bung na skelim vot i no gat bilip...

**SUPRIM** Kot i givim oda long nesenel Palamen i mas bung gen long dispela wik yet na vot long mosen bilong vot i no gat bilip long gavman.

Dispela oda bilong kot i bin kamap bihain long Oposisen i go kot long salensim pasin Palamen i bin mekim long miting bilong Jun we Oposisen i laik kamapim vot i no gat bilip long gavman.

Oposisen i bin givim notis bilong kamapim dispela vot long Opis bilong Spika na ol i tok save long ekting Spika.

Tasol ekting Spika husat i siaman bilong komiti i no bin singautim komiti long miting long kliaim notis pepa.

Em i no bin mekim wok bilong givim dispela notis i go long Palamen long Jun 8 bipo long Palamen i stopim miting na skruim taim i go long 2 Ogas.

Kot i tok tu olsem bikos ekting spika i no bin mekim wok bilong em, Palamen i no bin bung long toktok long dispela mosen bilong vot i no gat bilip.

Dispela bai namba foa taim bilong Oposisen i traim long muvim vot i no gat bilip long gavman na em i namba tri taim Palamen i no bin mekim wanpela samting.

Long taim bilong givim oda long Palamen i mas bung gen, kot i bin tok tu olsem dispela pasin i no bihainim konstitusen na givim sans long ol memba bilong Pposisen.

Oda bilong kot i tok tu olsem klek bilong Palamen i mas putim



dispela mosen bilong no gat bilip olsem namba wan bisnis long taim Palamen i bung gen long Fraide long 2 klok apinun.

Planti tok amamas i bin kamap long disisen bilong suprim kot.

Ol pipel i amamas na tok dispela disisen i soim olsem konsti-

tusen bilong kantri i strong moa na ol memba bilong Palamen i no mas ting ol i ken abrusim lo bilong kantri. Kot i soim ples klia tu olsem wanem notis pepa i kamap long opis bilong Spika na wok bilong husat long stretim na bringim i go long Palamen we ol

memba bai lukim na paitim tok-tok.

Na long dispela keis, yumi lukim ekting Spika i feil long mekim wok bilong em long bringim dispela notis i go long Palamen.

Long taim Praim Minista i harim disisen bilong kot em i bung wan-

taim ol loya bilong em long harim edvais bilong ol.

Long wankain taim tu, Praim Minista i tok Oposisen i westim taim na mani bilong kantri long singautim Palamen i kam bung gen. Em i tok ol i laik pilai politik tasol na i no tingim ol pipel bilong kantri.

Praim Minista i tok gavman bilong em i mekim bikpela senis tru long laip bilong ol pipel long givim fri edukesen, gutpela helt sevis, sanapim moa bris, ol rot na bringim ol bikpela ovasis bisnis i kam insait long kantri.

Ol dispela toktok bilong Praim Minista i tru.

Gavman bilong em i kamapim planti gutpela developmen na ol pipel i luksave na i tok tenkyu. Tasol em i abrusim mak liklik.

As bilong dispela salens em i no bilong daunim ol gutpela samting gavman i kamapim insait long faivpela yia, nogat.

As bilong dispela salens em long soim olsem maski i no gat inap memba long Oposisen, ol tu i gat rait long bringim mosen i go long Palamen na larim ol memba i skelim na tokaut sapos ol i sapotim o nogat.

Ol pipel i save olsem Gavman i gat moa memba long sait bilong ol na i no gat inap memba long Oposisen.

Olsem na Gavman i pret long wanem? Larim dispela vot i kamap na ol pipel bilong PNG i ken lukim.

## Go moa long skul i gat gutpela kaikai

LONG taim we ol wok na tok-tok i pas long pasin bilong rit na rait, wanpela i mas go long skul o gat save bilong rit na rait.

Long buk Baibel, King Solomon i tok long buk Gutpela Sindaun (Proverbs) Sapta 2 ves 2 na 3 i tok olsem: "... Na yu mas wok strong long kisim gutpela save. Na yu mas askim gutpela tingting na save long kam long yu, olsem yu singautim wanpela man i kam bilong helpim yu." Save i olsem wanpela gutpela samting olsem gol we wanpela i mas wok strong long painim. Skul tu i wankain, manmeri i mas wok strong long kisim gutpela save na dispela i min em i mas go long skul.

Sapos wanpela i go long skul em i mas traim long go moa na kism trening long



kolis o yunivesiti.

Dispela long planti as olsem em i ken kisim o painim wok isi, pe i gutpela na wanpela i gat sans long lain moa skul long subjek olsem Inglis, mets, saiens, sosel saiens, egrikalsa, art na musik em i laik long en.

O em i gat save bilong lukautim haus, kukim gutpela kaikai, lukautim na strongim laip.

Long stadi bilong pilosofi ol i kolim epistimoloji (Epistemology) em i tok taim man-

meri i gat save dispela i ken helpim em long ol disisen em i mekim long laip, long manmeri i luksave long wanem samting i gutpela, i tru na rait. Olsem manmeri i ken stap gutpela long laip bilong en.

Go long skul i wanpela long ol humen raits olsem gat rait bilong kaikai na dring wara olsem na maski wanpela i mangi o i lapun em i gat rait bilong go long skul long kisim save.

Wanpela i no mas ting olsem 'mi lapun pinis na i no gutpela long mi skul moa o dispela mangi bai go long skul na dispela mangi i no ken go'. Nogat.

Go long skul na kisim save em i gutpela samting.

Long Papua Niugini yumi amamas long Gavman i kamapim skul-fi fri polisi long 2012 na dispela i lukim planti

mangi i go long skul.

Moa yet, ol memba bilong Palamen i save baim skul fi bilong ol lain husat i go long ol kolis na yunivesiti.

Dispela ol kain polisi na sapot i gutpela bikos em i mekim isi long wanpela husat i laik go long skul i ken go isi long skul na kisim save.

Ol manmeri long Papua Niugini i no stap moa long ol liklik klen na traib bilong ol yet tasol i kamapim wol komyuniti pinis.

Taim manmeri i go long skul tingting bilong wanpela i op, i luksave long manmeri bilong narapela komuniti o hap long tingting ol i gat long en na long pasin ol i stap long en.

Em i ken lainim ol gutpela tingting na pasin bilong narapela hap taim sindaun o wei em i stap long en i no gutpela long em i kamap strong na stap gut.

**WANTOK**

Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579  
Email: editorial@wantokniuspepa.com

Pe bilong wanpela yia  
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# TENKYU AIR NIUGINI LONG GUTPELA HELPIM

James G. Kila i raitim

AIR NIUGINI em balus kampani bilong yumi ol Papua Niugini stret.

Air Niugini i karim plak bilong yumi ol pipel bilong PNG wantaim moa long 800 tokples, tasol yumi stap bung wantaim yet olsem wanpela kantri, wanpela pipel, na wanpela nesen.

Hia mi laik stori long taim hevi i bungim mi long Mosbi siti las mun, na ol wokman na wokmeri bilong Air Niugini helpim mi.



Ol kastoma sindaun na wetim toksave long ran bilong balus.



Air Niugini wokmeri i givim sendwis na dring long ol pasindia.

## Hevi long balus

Long Trinde Jun 8, 2016, i bin gat hevi na Air Niugini i stopim ol ran bilong ol balus. Mi bin stap long Ela Beach Hotel long Mosbi siti long wanpela trening woksop bilong PNG Semba ov Mains na Petroleum.

Dispela taim sosel midia i bin ranim ol toktok long fesbuk na ol teks long mobail fon olsem bikpela hevi stret i kamap long Yunivesiti ov Papua Niugini (UPNG). Sosel midia i tok olsem polis i sutim na kilim indai foapela sumatin bilong UPNG na bikpela hevi stret i wok long kamap long Waigani na rot baksait long Morata i go long Gerehu. Dispela ol toktok bilong sosel midia i kamapim pret na wari long planti lain long Mosbi siti na tu, papamama bilong ol UPNG sumatin long ol arapela senta long PNG.

Mi wantaim ol arapela wanwok bilong ol arapela maining kampani long PNG i guria na pret. Sampela long ol lain long trening husat i save stap long Mosbi i pret na kwiktai tru ring long mobail long sekim ol famili lain na ol sumatin long UPNG.

Long samting olsem em 5kilok long apinun, kampani kar bilong opis bilong mi long Mosbi i kisim mi na bringim mi long Is Boroko.

Long Fonde morning taim tru kar i bringim mi go long Jacksons ples balus long go bek long Madang. Tasol taim mi kamap long ples balus, mi lukim longpela lain i stap long lain bilong go long Madang, Wewak na Vanimo. Wanpela



mama i tokim mi olsem i gat sampela hevi na ating mipela bai i no inap kalap long balus.

## Longpela wet long Jacksons Ples balus

Tru tumas dispela hevi bilong polis wantaim UPNG sumatin i bringim pret pinis long planti hap nau na ol transpot sevis long Mosbi tu i stop.


Taim mi go insait long teminal bilong Jacksons ples balus, sampela lain i tokim mi narapela stori gen olsem ol pilot bilong balus i no wok long dispela taim bikos kampani bilong sekyuriti bas we i save bringim ol i go long ples-balus i pret long ran. Dispela i mekim na ran bilong ol balus i go long ol arapela senta i stop.

Ol wok lain bilong Air Niugini i tokim mipela long wet na ol bai stretim ol tiket. Oloboi,

dispela. Mipela i wet stat long 6 klok moning i go inap 4 klok apinun.

Bihain ol Air Niugini wok lain i putim wanpela notis antap long kastoma sevis seksen olsem ran bilong balus long Trinde na Fonde i go olsem long Maun Hagen em ol i stopim bikos i gat ripot long trabel i kamap long hap.

Mipela ol pasindina bilong Madang, Wewak na Vanimo i wet yet bikos mipela i no kisim toksave. Sampela pasindia i putim bek long simen na sindaun i stap. Sampela i pas long wol na slip bikos ol i kirap go long bikpela moning tru na ai bilong ol i bagarap tru long slip. Mipela i wet i go inap 5 klok long apinun olgeta, nau meri long sevis kaunta i kam na tokim mipela olsem, i no gat balus bai go olsem long Madang long apinun. Mipela



Ripota James Kila i sanap long rum long Crown Plaza na lukluk long Toaguba maunten.

Nupela rot long Paga Hill i go join wantaim daun taun Pot Mosbi siti.

Poto: James G. Kila

olgeta i go sanap long lain bilong kastoma sevis, tasol hangre tu bagarapim stret sampela. Ol Air Niugini wok lain i lukim mipela na bringim ol sendwis na ol kodiell dring i kam givim mipela long strongim bel.

Air Niugini wok lain long Kastoma sevis raitim ol oda pepa na tokim mipela long wetim ol bas bilong ol hotel mipela bai go stap long en, olsem long Lamana Hotel na Crown Plaza Hotel. Mi givim nem bilong go stap long Crown Plaza bikos em i stap long daun taun Pot Mosbi we planti nupela senis na developmen i kamap na mi yet laik skelim tu nait lait bilong Mosbi siti.

Dispela pasin Air Niugini i mekim long mipela em bi ahinim ol polisi bilong kampani long lukautim ol

kastoma bilong en, taim ol i painim hevi bikos i gat asua long ran bilong balus.

Taim bas i go lusim mipela long Crown Plaza Hotel long taun, mi no wet. Mi larim ol kago bilong mi long rum na hariap tasol, mi go daun na raun long daun taun Mosbi long lukim ol nupela senis i kamap long siti.

Bihain mi go bek long rum, redi na mi go daun long fes plua bilong hotel we ol i redim naispela dina kaikai. Tru tumas, mi raun long planti ples na skelim ol bafei kaikai tasol mi ken tokaut stret olsem bafei bilong Crown Plaza em i namba wan. Ol i kukim kain kain kaikai na lainim long tebol. I gat gutpela kain kaikai bilong solwara olsem ol kindam, selpis, i go long abus bilong graun olsem kau mit, pik mit, mit bilong pato, kakaruk wantaim kain kain kumu.

Long Fraide, 5 klok moning taim, Crown Plaza risepsen i ringim mi na hariap stret mi kirap waswas, redim mi yet na kalap long wanpela Gat Dok Sekyuriti bas, na ol i bringim mi wantaim ol arapela lain i go bik long Jackson ples balus.

Long dispela stori, mi makim olgeta kastoma long dispela taim bilong hevi long Mosbi, taim Air Niugini i helpim mipela na putim mipela long gutpela hotel olsem Crown Plaza na givim naispela kaikai long mipela.

Tenkyu tru Air Niugini.

# Transparensi Intenesenel PNG autim sevei

Frieda Sila Kana i raitim

**TRANSPARENSI Intenesenel PNG (TIPNG) i autim pinis wanpela Pablik Opinien o tingting Sevei bilong ol Mak bilong hevi i save kamap long Korapsen insait long PNG na long kisim wanem toktok bek bilong kantri na sosaiti.**

Dispela Pablik Opinien Sevei em ol i bin lonsim long taim TIPNG holim 2015 Enuel Jeneral Miting bilong ol long Crown Plaza long 29 Jun.

Korapsen em wanpela kain pasin bilong ol lain i gat pawa long mekim disisen bilong ol samting bilong pablik i save yusim pawa bilong ol long kisim samting olsem bilong ol yet. Na taim ol i mekim olsem, ol pablik na sitisen i save kisim hevi o i save stap rabis yet. TIPNG em wok strong yet long mekim ol pablik na gavman i luksave long dispela pasin nogut na pait yet long stopim, long wanem planti laip na sindaun i bagarap pinis long kain pasin ol lida bilong kantri mekim.

TIPNG i stap mekim dispela wok inap 20 yia o moa nau long PNG. Long 2015 TIPNG Enuel Ripot i soim olsem PNG i stap namba 139 long 168 kantri olsem wanpela korap kantri long wol. Wanpela ripot ol i kolim "Korapsen Pesepsen Indeks (CPI) i putim Papua Niugini long dispela mak. Na PNG i skoa olsem 25 long 100 na em i stap aninit yet long namel mak long wol wantaim 43 skoa.

Dispela mak i no gutpela tumas olsem na em i kam olsem salens long olgeta pablik na ol lain i stap holim ol posisen bilong pawa. "Sapos yumi les long pasin korapsen, bai ol kain lain bilong skelim pasin korapsen i lukim yumi olsem wanpeal strongpela kantri wantaim gutpela skoa.

Ol pipel bilong Papua Niugini i save harim stori bilong korapsen olgeta taim long ol gavman dipatmen na ol ejensi long kain kain rot we ol man

na meri i save yusim pawa bilong ol long kisim mani pastaim long givim pablik sevis. Planti lain i wok long mekim yet dispela kain pasin tasol lo i no save stopim ol bikos ol i save haitim na tu pablik i no save gut long ol we bilong stopim. I gat planti wok i stap long mekim yet long strongim o lwei bilong ol ejensi na ol institusen bilong gavman i save wok, long ol i no ken larim pasin korapsen i bagarap gutpela nem bilong gavman.

I gat Nesenel Enti Korapsen Strateji i stap tasol em i nidim sampela wok long kamap long larim dispela i kamap gut. Kain olsem i gat bikpela wok i stap long kamapim lo bilong larim ol pablik long ol i gat rait long kisim ol toktok long ol sistem bilong gavman na tu long wanpela lo bai banisim ol gutpela lain husat i laik tokaut long pasin korapsen i kamap.

TIPNG i wok long mekim planti wok aweness wantaim ol woksop, wokabaut bilong Sir Tony Siaguru, na long midia tu. Gavman tu i soim sapot taim PNG i go insait wantaim Yunaitet Nesen Konvensen Eges Korapsen, Open Gavman Patnasip na Ekstrektiv Industri Transparensi Inisetiv.

Tasol em i klia tru olsem intenesenel komyuniti i wanbel wantaim planti moa Papua Niugini sitisen olsem skoa bilong yumi long nogat pasin korapsen em i daunbilo tumas. Ol pipel i mas strong long helpim TIPNG long daunim korapsen long wanem kain liklik wei ol inap long mekim.

TIPNG i gat ol fainensel memba namba olsem 544 long 2015 i winim namba bilong 2014 em 472, na ol memba i kam long 16 provins na long ol kampani memba o koporet memba em 34 long 2014 na 2015 wankain namba. I gat tripela asosiesesen bilogn yut na profesesen asosiesesen i sain to long kamap memba.



Siaman bilong TIPNG, Lawrence Stephens (namel) i sindaun wantaim tupela wokman na wokmeri bilong TIPNG opis, long wanpela miting bilong TIPNG wantaim ol nius lain long bipo. *Wantok fail poto.*

## Ol lida i no bringim gut sevis

OL Lida i mas mekim gut wok bilong ol long bringim ol gavman sevis i go long ol pipel, dispela em i toktok bilong Gavana bilong Milen Bei, Titus Philemon taim em i bin bringim ol ripot bilong akwital bilong Distrik Sevis impruvmen Program mani bilong em long dispela mun.

Em i tok, nesenel gavman i save putim bikpela mani i go long ol provins na distrik tasol em i wok bilong wan wan Memba bilong Palamen na ol lida long mekim samting tru i kamap wantaim ol dispela mani.

"Mi no save bilong wanem na ol lida i save askim yet long moa mani taim ol i gat inap mani we ol i kisim pinis long provins na distrik bilong ol aininit long PSIP, DSIP LLGSIP i kam long nesenel gavman," Gavana Philemon i tok.

Mista Philemon i mekim ol dis-

pela toktok taim em i bin givim ol 2015 PSIP akwital ripot bilong em i go long Dipatmen bilong Implementesen na Rurel Developmen (DIRD) long Jun 1 long Pot Mosbi.

Em i tok, gavman i bin daunim mak bilong mani i go long PSIP gren long pastaim K5 milien long wan wan distrik i go daun K10 milien long 2016 fiskal yia em i orait yet.

"Mi orait tasol long gavman i senisim mani mak bilong PSIP i go daun long K10 milien. Mi no gat tok long dispela bikos K10 milien, em inap tru long mekim planti wok. Ol wan wan distrik tu i kisim K10 milien long wan wan yia bikos ol i mas givim sapot long ol LGG na helpim ol wok projek bilong ol," Mista Philemon i tok.

Em i tok olsem planti taim ol mani i save go aut leit long

Waigani i go daun long ol provins na em i save bagarapim ol wok proses o taim, olsem na mani i save rolova i go long narapela yia gen.

"Mipela ol lida i mas tingting smat na mekim wok long bringim sevis long ol pipel. Sapos mi inap long bringim sevis long ol pipel bilong Milen Be, mi no save bilong wanem na ol narapela provins i no inap long mekim wankain," em i tok.

Nau yet, ripot i kam long DIRD i tokaut olsem, namel long 111 Memba bilong Palamen, 37 memba i no bin bringim wanpela akwital bilong Provins na Distrik sapot Gren bilong ol long yia 2013- 2014. Nau yet ol dispela akwital i no kamap. Long dispela taim em Provinsal na Distrik Sapot Gren em ol Konstitusenenl Gren na wan wan memba i bin kisim K500, 000.



Gavana bilong Milen Be, Titus Philemon i bringim 2015 PSIP akwital ripot long DIRD long stat bilong dispela mun. DIRD Ekting Seketeri, Paul Sai'i i bin kisim dispela ripot. *Poto: DIRD midia.*

## Bmobile-vodafone kamapim Bestie Pek Kombo

BMOBILE-vodafone i kamapim wanpela nupela na gutpela promosen long PNG maket.

Dispela em i givim gutpela sans long baim tupela fon na tupela SIM long K99 tasol wantaim GST.

Sif Eksekutiv Opisa bilong Bmobail-vodafon, Parag Panjwani i tok olsem, "Ol kastoma i ken yusim globol we bilong baim samting na wantaim pawa bilong Vodafone ol inap long bringim trupela valiu long PNG Maket. Wantaim dispela mekpas yu ken baim ol fon wantaim gutpela prais na yu ken toktok wantaim ol wantok bilong yu tu. Na sans long ekspiriensim ol bikpela plen bilong mipela."

Ol Avvio (220) fon i gat; VGA kamera, FM Redio,, Blue tooth, 8 Gigabait SD, MP3 pilai.

Mista Parag Panjwani, Sif Eksekutiv Opisa bilong Bmobail-vodafon i tok, "I gutpela tu long lukim dispela ofa na mipela amamas long putim aut long Dispela i go wantaim ol promosen bilong

K2 tasol long ring insait long wanpela de, we mipela i laik givim nambawan prodak long ol kastoma bilong mipela long PNG."

Dispela promosen i stap long olgeta hap bilong kantri we i gat ol stua i save salim ol prodak bilong bmobail-Vodafon.

Bmobile-Vodafon em i wanpela telekom opereta we i wok long go bikpela tru olsem insait long PNG na Solomon Ailan. Dispela rolaut bilong hai spit data long PNG i stap pinis long Pot Mosbi, Lae, Maun Hagen, Goroka, Kainantu, Kundiawa, Manus, Simberi, Wewak, Ramu na Madang taun na moa ples bai kam insait bihain liklik.

Ol lekmak bilong ol i wok long go strong yet wantaim ol patnasip bilong ol bikpela ritel stua olsem City Pharmacy Limited, Seeto Kui na Papindo. I no long-taim i go pinis ol i bin opim nupela stua bilong ol long nupela wing bilong Visen Siti long Pot Mosbi.

Vodafone em i wanpela bikpela mobail komyunikesen kampani long wol we i gat 450 milien kastoma. Nau yet em i stap long 20 kantri insait long 5-pela kontinen o bikpela hap graun long wol na em i gat moa long 55 patna network.



Wanpela selsmeri bilong bmobail-vodafon i soim nupela Avvio fon mekpas dil.

# Digicel Play wok wantaim lokal danis resis

**DIGICEL Play i stap baksait long "Bringim i go daun long plua" Danis Resis bilong Cosmopolitan, bilong dispela yia.**

Cosmopolitan, bikipela nait klap long Mosbi i gat rait bilong givim nem long dispela resis.

Dispela resis bai ran inap long 8-pela wik long Sarere 9 Julai i go long Sarere 3 Septemba, na bai givim sans long ol yangpela hip-hop danis lain long soim laik bilong ol long danis bilong strit long ol siti na taun insait long Pot Mosbi.

Digicel Play CEO, Nico Meyer, i tok em i bin amamas long bung wantaim The Cosmopolitan long brodkastim stail na save bilong ol yangpela pipel insait long kantri.

"Mipela i amamas long promotim wok bung bilong dispela samting i go long olgeta hap wantaim brodkas bilong TVWAN television, redio pilai, niuspepa na edvetismen, edvetaising skrin na sosel midia long soim aut dispela narapela kain stail bilong danis insait long Pot Mosbi," em i tok.

"Olsem spona bilong givim nem, mipela tu bai givim aut wanpela K15,000 prais mani i go long wan wan lain husat i soim naispela stail tru bilong danis insait long dispela resis.

"Digicel Play i gat bikipela tingting long kamapim ol kain kain stail bilong danis i kam long olgeta hap bilong PNG, olsem ol at."

Ol pablik i ken kam insait long dispela resis sapos ol i gat krismas 18 yia na i go antap wantaim prais mani K8,000, K4,500 na K2,500 bilong namba wan wina, namba tu na namba tri ples.

Jeneral Menesa bilong The Cosmopolitan, Martin Sherry, i tok em i gat bikipela tok tenkyu long sapot bilong Digicel Play.

"Mi laik tok tenkyu long Digicel Play long gutpela pasin bilong en long spona long danis resis we mipela i bilip bai kamap bikipela tru long The Cosmopolitan," em i tok.

"Mipela i amamas long tokaut long ol jas olsem ol lain bilong tieta, ats na danis koriografi o danis profesenel, bilong strongim ting-

ing bilong kamapim nupela kain stail na tingting, konfidens na long kamapim moa save long danis namel long wan wan danis kru memba.

"The competition bai gat 4-pela raun bilong resis, wanpela taim bai seken sans raun, tupela semi fainel raun, na bai pinsim wantaim gren fainel pait long soim long Septemba 3." Mista Sherry i tok. The Cosmopolitan "Bringim i go daun long plua" Danis Resis bai kamap insait long namba wan hap bilong lokal program bilong TVWAN, "Hang-Out" we bai kamap long televisen long tumora, Fraide 15 Julai.



Yoga bungim PNG pastaim long wokim danis.



Bauns yunit opim ol resis wantaim wanpela Oriental pefomens.

## Mambu ben mekim musik long Madang raun wara

**James G. Kila i raitim**

LONG Fraide, Julai 1, 2016 planti ol manmeri i mangal stret na amamas tru long harim naispela mambu ben musik na singsing i kam olsem long wanpela banana bot we i trip long raun wara long Madang taun.

Pairap bilong mambu na nek bilong naispela stringben musik i swit stret na win i karim i go stret long ol manmeri i sanap na raun long lukim nupela Madang taun maket i op.

Dispela dingi i karim ol stail mangi bilong pilai musik bilong ples Bilia na ol i mekim naispela stringben musik wantaim mambu ben na gita na singsing nais tru.

Planti ol lain husat save laikim pairap bilong mambu ben na musik i muv i go arere long liklik bris o jeta we ol wokman i wokim bilong nupela Madang taun maket na lukim na harim ol lain bilong Bilia i pilai antap long dingi na singsing.

Ol dispela stail grup bilong Bilia em planti long ol i gat nem long pilai wantaim Melanesian Mambu Ben, we i rekot pinis pastaim na i save kamapim naispela mambu ben musik bilong

Madang. Planti ol song bilong ol i save kamap long NBC Redio Madang na tu long nesanel redio we ol manmeri long PNG i save laikim stret.

Sampela ol memba bilong Melanesian mambu ben na Kool Figures tu i stap antap long dingi

na pilai na singim ol naispela feveret namba em ol manmeri i harim na laikim tru. Ol i singim tu provinsal entem bilong Madang "O Fatu" na ol arapela song olsem "Kei Londari Mata" bilong Solomon ailan.

Wanpela biknem musikman bi-

long Madang, Larry Nalon i holim lid gita na pilai na brata bilong em Gobson i pairapim mambu na ol arapela stail lain olsem Olson Leffy na Danny Boy i pairapim string bilong gita long wokim naispela musik stret.

Tru tumas naispela karai bilong

musik i kam olsem long raun wara bilong Madang i go long ol manmeri i harim i gutpela stret.


Planti ol lain i tok olsem dispela em wanpela kain pasin we i ken promotim turis indastri long Madang em ol bagaros bilong Bilia i soim stret.



Ol boi bilong Bilia pilai musik long bot long raun wara long Madang long amamasim nupela Madang taun maket. Foto: James G. Kila



# Em nau! Ol pikinini i ken painim rot i go long ples wantaim Wantok lain...



# PAINIM WOD PILAI

Ol wod lista:

- |                 |               |                 |
|-----------------|---------------|-----------------|
| <b>GUTWOK</b>   | <b>MAKAS</b>  | <b>RAPIM</b>    |
| <b>HARIM</b>    | <b>MEMBA</b>  | <b>RONOWE</b>   |
| <b>KAGO</b>     | <b>NUYIA</b>  | <b>SAINAMAN</b> |
| <b>KERASIN</b>  | <b>OLGETA</b> | <b>SEKSEK</b>   |
| <b>KOKOMO</b>   | <b>PAPAIA</b> | <b>SMOLPELA</b> |
| <b>LILIMBUR</b> | <b>PEPA</b>   | <b>TANDOK</b>   |
| <b>LUKLUK</b>   | <b>POTETO</b> | <b>TRAUSIS</b>  |

R S E J S T X O P N A E E F G J P M X E B N W L D  
Z V D C P Q L M H G W R Z A C C I D O D E S G O W  
P I E T E H H C H O R H C Z E Y O Q T R B M X L M  
N I D A T S S K N R I S P L S C C U O G I F C G T  
M A K A S A E O I T A S Y E E F X Z O N R E L T O  
I C S C I X R A P I M E C D N V X H B N E E L N M  
U E A A A F F O N E C D G R L D M U C R O N M R P  
X C P T M A T Z V R O L G E T A N D O K I P C A K  
C A O E P E Q M V A O A H A R I M U M B S X E M S  
P R K E T H R M Q D R W U G A E I I Y E F X H I U  
G S P O L T W I E N S K U T U G T D U I Q N S T Q  
D N P M K U H M N M E E A G S T I V N E A E T S S  
O T I N O O K A A D B R K I I I W Z S S X V D L D  
P N H H G P M L T J B A T S S G X O T K S T T S H  
P O Q A F A E O U K A S K K E E M I K K T I M R L  
S F K F N P L M I K I I I F X K A E N E M L U E I  
P J L I L I M B U R R N A P H L N F S L U E E A D  
V E A O N R N J E U A O S O F T R T F E X M K R E  
E S M R A D I S K A I N A F L P Y R W E I O A C E  
E S F R J Z N M H Z M E I V T N Y G Q I E L R N O

# STORI BILONG TUMBUNA

## Ol longlong pipel

**B**ipo tru ilong Bagabag Ailan Binsait long Madang Distrik i gat tupela lain manmeri i stap. Wanpela lain i gat gutpela na stretpela tingting. Na narapela lain ol i gat krangi o hap longlong tingting.

Ol i stap klosut long wanpela pasis mipela i kolim Semanur, long hap i go olsem long san kamap. Ol i no tingting tumas long kamapim samting o wokim samting.

Wantaim ol i save makim ol arapela lain manmeri i gat gutpela tingting na makim ol pisin i save kisim abus na flai antap long skai. Olgeta de ol i sindaun stap na lukim ol arapela gutpela man i gat gutpela ting i save wokim basket bilong pis na kisim planti pis long en. Tasol ol Ngiringar i kisim wanpela tingting gen. Ol i ting dispela aidia ol man tru kisim pis long en em i no stret. Olsem na ol i laik bihainim narapela aidia. Oltaim ol man tru i larim basket bilong ol pis na wantaim kaikai bilong pis. Em i no stret.

Wanpela moning lapun mama i singautim tupela pikinini bilong em na i tok: "Tupela pikinini, mi laik yumi ken wokim wanpela basket. Tasol yumi no ken putim kaikai bilong ol pis. Yumi ken putim kaikai bilong mi inap bilong tupela wik. Olsem bai mi yet kisim planti pis moa." Tupela pikinini harim toktok bilong mama, na tupela i helpim mama long wokim wanpela bikpela basket bilong em. Ol i kisim kaikai, wara, na paiawut, na olgeta samting bilong slip.

Wanpela moning tupela subim kanu i go daun long solwara na putim bikpela basket i go antap na putim tupela traipela ston antap tu. Na lapun mama i sindaun na tupela i pul i go long biksolwara. Tupela pul, pul i go na painim ples i gat planti pis. Tupela tokim mama na em i go insait long bikpela basket na tupela pasim tupela ston long hap hap na putim mama wanpela basket

isi isi i go daun long solwara. Tupela i askim mama, "Mama olgeta samting yu bin toktok long en, em olgeta i orait, a?"

Na mama i tok, Yes, olgeta samting inap. Tasol yupela i no ken i kam namel long wik. Inap tupela wik i pinis, orait yupela ken i kam. Mi ting dispela kaikai em inap tru bilong tupela wik." Em i tok olsem, nau tupela i slekim em i go daun samting olsem 6 fit aninit long solwara. Tupela slekim mama wantaim hevipele ston long basket i go daun tru na sindaun antap long wesana. Tupela i putim wanpela mak long ples tupela i putim mama i go insait long solwara. Tupela pul i go bek long ples na wetim mama i stap. Tupela i stap i stap inap wanpela fotnait pinis. Nau tupela redi bilong i go na kisim mama wantaim pis i kam. Tupela i kirap long moningtaim na subim kanu i go daun long solwara na tupela i pul, pul i go long mama.

Klostu olsem wanpela mail samting na tupela i pilim solwara i kamap narapela kain liklik. Tasol, tupela i strong yet pul i go kamap long ples tupela i bin putim mak long en. Hariap, hariap tupela pulim mama wantaim basket i kam antap. Samting olsem siks yat na tupela i pilim han i hevi tumas. I kam antap olsem faiv fit samting na lukim basket yet tupela i smelim mama.

Tupela i tingim tasol, tupela slekim i go daun na pilim samting i mekim nois. Em mama tasol i sotwin na daunim solwara na em i mekim nois bilong putim bek em kam antap. Tasol tupela i strong na slekim i go daun kwiktaim. Tupela brata i wari tru long mama na lusim em i go daun long solwara na tupela i go bek sua. Nau tupela tasol i stap long Semanur.

*Man i raitim dispela stori em Galun, na Tam Loi Saian i tanim.*

Ansa bilong Wod Pilai isu 2182





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

## Don Polye i ken wokim kot keis long kisim Palamen i bung

Sam Seke i raitim

**SUPRIM** Kot bilong Papua Niugini i tok Oposisen Lida, Don Polye em inap long kisim kot eksen long singautim Palamen long bung gen.

Niusmeri bilong ABC long Pot Mosbi, Joy Kisselpar i tok dispela kot ruling i narapela long edvais we ol loya i givim long Spika bilong Palamen, Theo Zurenuoc MP.

Mista Zurenuoc i bin tok olsem Mista Polye i no gat rait long singautim Palamen long bung gen.

Ol loya bilong Spika i tok



Don Polye i sekan wantaim deputi bilong en.

dispela em long wanem, i gat ileksen petisen i stap yet egensim Mista Polye.

Tasol kot i tok Mista Polye inap bringim kot keis, aninit long lo.

## Bogenvil Kakao Festival

Caroline Tiriman i raitim

**NAMBA WAN** Soklet Festival long Atonomas Rijon bilong Bogenvil i bin pulim planti turis wantaim ol kakao fama na ol lain long turisim sekta.

Dairekta bilong Turisim long Bogenvil, Lawrence Bele, i mekim dispela toktok bihain long Soklet Festival i bin stat long Trinde long Buin Taun na i bin pinis asde nait long Arawa.

Dispela tupela ples i stap long Sentral na Saut Bo-



Ol i soim ol kainkain kakao long Bogenvil Soklet Festival.

genvil na planti pipel bilong Not na Saut Bogenvil tu i bin kamap long en.

Festival ya i bin lukim ol kakao fama wantaim tu ol turis bisnis i bin wokbung bi-

long mekim dispela festival i kamap gut.

Dispela festival em i hap long ol wok em Bogenvil gavman i laik mekim long apim wok egrikalsa na turisim.

## Loya i wokim keis long stopim O'Neill long makim ol sumatin enkwairi

Sam Seke i raitim

**LOYA** husat i makim ol sumatin long UPNG Pot Mosbi na long UNITEC long Lae i tok em i wok long redim ol kot pepa long stopim dispela Komisn ov Inkwairi Praim Minista Peter O'Neill i laik kirapim.

Dispela inkwairi bai lukluk i go insait long ol vailans i bin kamap long ol yunivesiti kempas, na stopim ol kain pasin long kamap long taim bihain.

Tasol loya bilong ol sumatin, Laken Aigilo i tok Mista O'Neill nau i as bilong ol dispela hevi we i bin kamap long ol yunivesiti, na em bai no stret long em yet i makim ol memba bilong komisn.



Ol UPNG sumatin na loya bilong ol i selebretim win long eviksen oda .

Mista Aigilo i tok tu olsem, em i wok long redim kot keis long "klas eksen" egensim ol polis opisa, ol komanda, polis minista na i go inap

long praim minista.

Dispela em long pasin we ol polis i bin sutim ol sumatin long UPNG long Jun 16.

## PM Sogavare i toktok long namba 38 Independens anivesari

Sam Seke i raitim

**PRAIM** Minista Manasseh Sogavare i yusim Solomon Ailan 38 anivesari bilong independens long Britain long namba 7 Julai, 1978, long mekim strongpela toktok long sait long rekonsiliesen o wokim sekan pasin.

Narapela nem we olgeta i save kolim Solomon Ailan tu long en em "The Happy Isles". Planti i save long pait namel long tupela grup long Solomon Ailan i bin stat long yia, 1998.

Bel isi i bin kam bek long Solomon Ailan bihain long Rijonal Asistens Misin o RAMSI i go long Si long 2003.

Dispela pait namel long ol Malaita na Guadalkanal i bin kamapim hevi tu long Westen Provins and kantri olgeta.

Planti pipel bin dai na planti i lusim ples bilong ol long Guadalkanal, loa na oda moa yet long Honiara na Guadalkanal i bin bagarap, ikonomi i bagarap na pipel i bungim hevi long planti eria.

Maski ol samting i kamap orait nau wan-

taim helpim bilong RAMSI, gavman bilong Praim Minista Manasseh Sogavare i tingting strong olsem rekonsiliesen i mas kamap namel long ol eks paitman na ol viktim.

Gavman i bin sanapim dispela Nesenel Hiling na Apoloji program we i wok long holim ol rikonsiliesen miting long Honiara, Guadalkanal, Malaita and Westen Provins we i gat long em tu, ol pipel bilong Bogenvil.

Praim Minista Sogavare i yusim Independens toktok bilong em long Honiara long kik bek long olgeta.

Insait long ol yia bihain long 2000 Townsville Pis Agriment, gavman i bim tromoim planti milien dola pinis long kompensesen.

Tasol Praim Minista Sogavare i tok em bai wokim kompensesen lo bilong olgeta viktim gavman i mas baim kompensesen i go long ol.

Em i tok olsem Solomon Ailan em i wanpela Kristen kantri na em i mas bihainim Kristen wei, na i no pulim toktok tumas.

Praim Minista Sogavare i toktok tu long Stet na Nesen bilding, na em i salim bikpela tok tenkyu i go Rijonal Asistens Misin long olgeta helpim long bringim gutpela sindaun na sekan pasin long gavman na kantri.

Ol pipel bilong Solomon Ailan long ol komyuniti long kantri na ol dispela i stap long ol narapela kantri i bin wokim selebrensen long makim dispela de tu.

## UPNG i pasim 2016 skul yia

Caroline Tiriman i raitim

**KAUNSIL** long Yunivesiti bilong Papua Niugini i pasim pinis 2016 skul yia na olgeta sumatin i mas lusim yunivesiti long Sarere.

Ol bikpela trabel em ol sumatin i bin mekim long 8-pela wik long sapatim askim bilong ol long Praim Minista Peter O'Neill long lusim wok bilong en bihainim ol tokwin bilong korapsen.

Eking Sansela bilong UPNG, Dokta Nicholas

Mann i tok olsem ol Yunivesiti bilong PNG i stap olsem wanpela ples bilong ol lain wanpinis long pait na kamapim trabel namel long ol yet, na ol i no laikim dispela kain pasin long go het.

Em i tok tu olsem sampela sumatin i stap long ol dispela protes i save kamapim trabel long ol tisa, wok man-

meri na ol narapela sumatin long yunivesiti.

Dokta Mann i tokim Redio Australia tu olsem, ol gavman yunivesiti long PNG i mas lainim sampela gutpela samting long ol sios yuniversity olsem Divine Word na Pacific Adventist University i no bin stap long ol protes.



UPNG Eking Sansela, Dokta Nicholas Mann.

## Mama lo bilong Australia i no luksave long ol asples

Sam Seke i raitim

**LONG** laspela stori bilong ol Aborijinal na Torrest Strait Ailan pipel bilong Australia long Naidoc Wik, bai yumi lukluk long rot we kostitusen o mama loa bilong Australia i no luksave long ol.

Maski ol indijines pipel i bin stap long Australia samting olsem 50 - 60 tausen yia pinis, yia 1901 konstitusen bilong Australia i no gat wanpela toktok long luksave long ol.

Wanpela muvmen i go get nau long luksave long ol

olsem ol i fes pipel bilong Australia insait long Preamble o bikpela toktok long stat bilong Konstitusen.

Mi ken tok long hia olsem long ol konstitusen bilong yumi long Papua Niugini, Vanuatu na Solomon Ailan na olgeta independen kantri long Pasifik, ol i gat luksave long yumi ol indijinis pipel.

Ol Preamble toktok bilong yumi i luksave long ol tum-buna bilong yumi, graun bilong yumi, ol kastom, kalsa, wanpinis, Melanesian velyu, yumi independen, luksave

long God, gavman na planti moa.

New Zealand i no gat konstitusen. Em i gat ol triti o haphap mama lo, na wanpela long ol em i Triti bilong Waitangi.

Triti bilong Waitangi we gavman bilong England i bin sainim wantaim ol Maori Sif long 1840, i givim luksave long rait bilong ol Maori pipel long graun na propeti bilong ol.

Clive Moore, Emeritus profesa long Yunvesiti bilong Queensland long sait long Australian na Pasifik histori i tok long Australia, i no gat wanpela luksave long ol indijinis pipel insait long mama loa.

# Theresa May i nupela Praim Minista bilong Ingran: Cameron i lusim sia asde

**WANPELA** kain taim long politik i bin pinis long Mande-nogat man i bin ting bai kamap olsem na tu, no gat ileksen, taim Praim Minista, David Cameron i tok em bai pinis long wok long tupela de, i kam na larim Theresa May i go insait.

Theresa May em i wanpela senia memba long kabinet bilong em na em bai kamap olsem namba tu meri praime minista bilong Briten long dispela hatpela taim long poilitikel histori bilong Ingran.

May i gat 59 krismas na gutpela piksa bilong em olsem Home Seke-teri, meri i gat strongpela tingting na wok i mekim em i rait meri long taim we Ingran i wokim bikipela disisen long stap o lusim Yuropien Yunien (EU).

Ol ripot i tok Theresa i bin gat

tingting long kamap wanpela lida long kantri longpela taim i go pinis na ol poro bilong em i tok em bin laik kamap olsem namba wan meri praime minista bilong Ingran. Na em i sapos long gat sans long traime dispela posisen long 2018, tasol EU referendam we David Cameron i bin holim posisen na i kamap na lusim- wanpela yia bihain long em i kisim pati long win insait long 23 krismas, ol politisen na ol kendidet i traime na lus bihain long Mista Cameron i risain- inap Misis May i kamap olsem yuniti kendidet long kisim ples bilong em na go sindaun long Dowling Strit opis.

Misis May em i strongpela meri long sait bilong politiks. Em i liklik lain long ol meri i stap long hai level mak long Konsevetiv pati in-

sait long 17 krismas, na em i no surik long autim toktok na tingting bilong em long ol trupela samting.

Cameron i bin tokaut olsem em i risain long las mun bikos em i bin sapatim referendam vot long UK i mas stap bek wantaim EU, na taim ol i lus, em i bin laik go aut.

Wankain wantaim Mary, tasol pilai politik pait namel long ol politisen, taim i no stret, namel long ol lain i bin win long referendam vot i mekim mary i kamap kendidet long praime minista.

Em nau bai wok bilong em long kisim Ingran we nau i bruk bruk, i go aut long EU.

Nau ol wok i kamap hariap. Long Mande moning, tupela kendidet bilong Konsevetiv Pati, long kamap PM i bin stap. Em long Andrea

Leadsom na Theresa May. Na Leadsom i bin risain na lusim May i stap. Na long Mande apinun, Cameron i bin risain na lusim Dowling Strit opis insait long 48 awa.

"Bai yumi gat nupela priame minista long bilding long tude (aste) nait," Cameron i bin tok ausait long opisel haus bilong lida.

Cameron i bin kamap PM bilong Ingran long yia 2010 i tok em bai givim risain pas bilong em i go long Kwin Elizabeth long Buckingham Pales long aste. Na Kwin bai askim May, olsem pati lida wantaim bikipela mak bilong ol Palamen MP long go pas long nupela gavman," Misata Cameron i tok.

Long wankain taim, namel long planti ol wanwok na wan pati bi-



**Nupela praime Minista bilong Ingran o Briten, Theresa May.**

long em, May i tok em i amamas na tok tenkyu long ol i makim em olsem pati lida na nupela Praime Minista.

## NATO bung i strongim stap bilong Alaiens long lsten sait



**Ol lida bilong NATO i bung long Warsaw, kapitel bilong Poland.**

OL lida bilong NATO long las wik Fraide i bin tok orait long strongim lsten Flenk o sait long Alaiens o ol memba bilong em. Olsem na ol bai putim 4-pela batalien ami i gat long en, 1,000 soldia i go long Poland na ol Baltik Stet, NATO Seketeri Jenerel, Jens Stoltenberg, i tok.

Namba wan hap bilong bung i bin toktok tu long strongim beis bilong NATO long hap bilong sautis na i tok ol bai stat long redim ol wok long misail difens sil.

Ol i bin toktok tu long Saibaspes o komyunikesen long kompiuta netwok i save kamap na stap. Dispela em nupela operesen eria bilong ol nau.

Mista Stoltenberg i tok ol disisen ol i wokim tude em i bilong gutpela bilong bihain taim. Em i tok tude i gat planti ol birua i save kamap olsem na NATO i hariap long redi long bungim ol dispela salens.

Ol i mekim ol wok redi nau bihain long ol samting ol i bin pasim tok long mekim insait long wanpela bung bilong ol long Wels tupela yia i go pinis.

"Mipela i bin wanbel long strongim ol ami long isten hap bilong Alaiens,"

Stoltenberg i tok.

Bai i gat foapela strongpela maltinesenel betalien neks yia na bai ol i wok long Poland, Latvia, Lithuania na Estonia.

Stoltenberg i tok dispela disisen bilong ol i soim strong bilong ol kantri i stap long tupela sait wantaim bilong Atlantik. Sapos ol birua i kamap long wanpela memba, em i soim olsem olgeta memba bilong Alaiens tu i bungim dispela hevi. Em i tok ol bai stap long ls inap ol i lukim olsem i no gat moa birua pasin bai kamap.

Ol i tokaut long dispela bung olsem Kanada bai i go pas long batalien long Latvia, Jemani bai lukautim Lithuania, Briten bai lukautim Estonia na USA bai was long Poland. Olgeta kantri insait long Alaiens i tok bai ol i kontribut long strongim lsten Flenk.

Long Fraide Minista bilong Difens long Briten, Michael Fallon i tokaut olsem 500 soldia i redi long go long Estonia, and 150 bai go long Poland. Presiden Barack Obama i tok bai i gat 1,000 soldia bilong US i stap long Poland na 500 Soldia bilong Jemani bai i go long Lithuania.

## Dallas trabel: Gan man i sutim na kilim 5-pela polis opisa

Faippela polis opisa i dai na sevenpela i kisim bagarap bihain long wanpela man i sutim ol gan long taim wanpela protes ol i kolim Black Lives Matter i bin kamap long Dallas, Texas.

Dallas polis dipatmen sif, David Brown i tok tupela man i bin sut long ol polis opisa long taim bilong dispela protes.

Ol polis i kilim indai wanpela gan man na ol i holim tupela arapela. Wanpela bilong ol em wanpela blakskin meri.

Dispela saspek husat i bin sut long ol polis inap 45 minit samting. Em i tok i gat ol bom i stap nabaut long siti.

Dispela saspek i bin tokim ol polis olsem graun bai pinis nau na bai em i kilim na givim bagarap long planti moa bilong ol na i gat ol bom i stap nabaut long taun," David Brown i tok.



**Ol lain i protes long Baton Rouge.**

Ol polis i sekap na tokaut olsem i no gat ol bom. Ol i kisim ol tripela saspek i go long polis stesin.

### Presiden Obama mekim strongpela toktok

Ol pipel i bung na mekim ol protes mas long ol siti long Amerika egensim pasin

we ol polisman i bin sutim indai tupela blakskin man. Long Minnesota na Louisiana.

Ol polis i sutim Philando Castile husat i gat 32 krismas, long taim ol i stopim ka bilong em klostu long Minnesota long las wik Fonde. Tel lait bilong ka bilong em i

### Presiden Baron Waqa i win gen

Presiden Baron Waqa bilong Nauru i winim gen sia bilong em na ol i tokaut long 19 arapela memba i win long sit bilong ol tasol ol i stopim tupela sit long Aiwo bihain long sampela kot salens i bin kamap.

### Ol Iraq pipel i kisim taim long ol IS

Ol Iraqi i bungim hevi long Islamik Stet pait i ronawe i go long ol refujikem klostu long Mosul.

### Saut Sudan: Planti tausen i ronawe bihainim bikipela pait long kapitel

PLANTI tausen pipel i ronawe bihain long bikipela pait i kamap long kapitel bilong Saut Sudan las Sande namel long

Vot long jeneral ileksen i bin pinis long Sarere tasol ol lain long Aiwo i bin pinis vot long Mande.

Wanpela kendidet i kros bikos ol i tok em i no inap resis olsem na em i salensim long kot.

Taim voting i wok long stat, kot oda i bin kamap na ol i stopim voting. Tasol ol i kisim ligel eksen egensim dispela. Dispela i mekim planti pipel i paul,

Planti i tok ol i kisim hatpela taim aninit long IS na olsem ol i wok long ronawe i go olsem long Mosul.

Um Sayeed i wanpela long ol 20,000 pipel i bin ronawe long mun mas i tok planti pait pasin, gan i pairap na troim ol bom, bagarapim ol haus na

ol pastaim paitman na ol gavman soldia. Saut Sudan em i nupela kantri, i gat 5-pela krismas tasol.

Pait i bin stat long wes bilong Juba we ol pastaim paitman na gavman soldia i gat beis long as bilong Jebel Kujur maunten klostu long Yunaitet Nesens kem.

Pait o woa i bin stat long Desemba 2013 napait nau i stat taim pipel i selebretim 5-pela krismas bilong nupela

tasol bihain, voting i go het long dispela wik Mande.

"Nupela Nauru Ilektoral Komisnin i go pas long dispela jenerel ileksen long namba wan taim.

Samting olsem 67 kendidet i resis long dispela ileksen. Samting olsem 8,000 pipel tasol em ol i rijista long vot.

Vot i go gut tasol long olgeta hap bilong ailan.

pipel i stap long namel.

Em i tok ol IS i wokim ol nogut, i no gat wok, nogat kaikai na pipel i stap hangere.

Moa long 3.3 milien pipel i lusim ples bilong ol bihainim ol dispela trabel, pait na hevi.

kantri bilong ol.

Pipel i wok long ronawe i go olsem long Uganda.

US Embasi i tokim ol lain bilong em long noken go ausait, tasol i stap insait long ol haus bilong ol bikos pait i stap na ples i no seif.

Ol ripot i tok 150 soldia long tupela sait i dai pinis, tasol i no gat ripot Hamas pipel i dai long dispela pait.

# Kos bilong mekim bisnis em i antap



Asua bilong lo na oda em i wangepa bikipela samting na bisnis manmeri i westim bikipela mani long sekuriti.

## KOS bilong ranim bisnis long kantri em i antap tru, Dairekta bilong Bisnis Kaunsil ov PNG, Chey Scovell i tok.

Mista Scovell i tok asua bilong lo na oda em i wangepa as we i wok long kilim dai ol liklik bisnis long gro.

Mista Scovell i tokim wangepa bung bilong bisnis las wik olsem 10 o 20 pesen bilong mani ol bisnis manmeri i save yusim long ranim operesen bilong bisnis bilong ol, i save go long sekuriti.

Em i tok ol bisnis manmeri i save yusim bikipela mani long ol wok manmeri, na baim graun o rentim haus o opis, tasol winmani ol i save mekim em i liklik tasol.

“Asua bilong lo na oda em i wangepa bikipela salens bilong dispela kantri. Em i wok long stopim ikonomi bilong dispela kantri long gro i go bikipela,” Mista Scovell i tok.

Em i tok edukesen em i wangepa bikipela samting we gavman i mas lukluk gut na pro-

motim long helpim ol yangpela manmeri i skul, kisim save na kamap gutpela man o meri long komyuniti bilong ol.

Mista Scovell i tok taim prais bilong ol stua samting na arapela ol sevis i go antap, ol bisnis manmeri i wok long yusim bikipela mani long ranim bisnis tasol winmani ol i mekim em i liklik.

“Lukluk go bek long ples, yumi wok long tok moa long 85 pesen manmeri i wok long egrikalsa. Tasol ol dispela manmeri i no salim planti samting ol i planim long ples.

“Ol i salim liklik tasol long helpim ol yet i stap long ples. Yumi mas helpim na larim ol i salim ol samting bilong ol olsem kaikai long bikipela na gutpela maket we ol i ken mekim moa mani.

“Namba bilong ol manmeri i no gat wok tu i wok long gro i go antap na kamap bikipela. Yumi mas larim ol dispela manmeri i wok gut na kirapim ikonomi bilong dispela kantri,” Mista Scovell i tok.

# Air Niugini lukluk long Saina

NESENEL balus kampani bilong PNG, Air Niugini, i laik kamapim dairek flait long Pot Mosbi i go stret long Beijing long Saina, Bod Siaman Sir Frederick Reiher i tok.

Long las wik Prais Minista Peter O'Neill i bin bungim Presiden bilong Saina, Xi Jinping, long Beijing, na sainim sampela agrimen.

Namel long arapela agrimen Presiden Jinping na Prais Minista O'Neill i bin sainim long strongim bisnis na invesmen long tupela Saina na PNG, ea sevis agrimen em i wangepa agrimen we tupela lida i bin sainim. Sir Frederick i tok Air Niugini

ini bai yusim dispela sans long kamapim ol dairek flait namel long Pot Mosbi na Beijing, na kisim i kam insait planti ol investa, bisnis manmeri na turis bilong Saina.

“Dispela ea sevis agrimen bai helpim Air Niugini na yumi olgeta. Namba bilong turis manmeri long Saina i wok long gro i go antap, na Presiden Jinping yet i tok long promotim PNG olsem wangepa gutpela kantri long kam raun long malolo o bisnis,” Sir Frederick i tok.

Em i tok Air Niugini bai inap long kamapim ol sata flait i go long Shanghai long taim bilong selebretim Nu

Yia bilong Saina.

Em i tok Air Niugini i plen long kamapim komesel flait i go long Saina long yai 2017, tasol ol balus sata bai i ken go long Saina bikos agrimen i stap pinis.

Em i tok Air Niugini i amamas long Prais Minista Peter O'Neill na gavman i opim planti nupela rot long bringim moa manmeri i kam insait long kantri.

“Mi bilip olsem namba bilong turis i kam long Saina bai go antap na planti manmeri Saina bai amamas stret long kam lukluk raun long gutpela kantri bilong yumi,” Sir Frederick i tok.



Balus bilong Air Niugini i pundaun long Brisben ples balus long Australia.

# Ol stilman lukluk nau long rurel bisnis lain - Isanda

James G. Kila i raitim

OL LAIN i gat ol bisnis long ol rurel stesin long Madang i mas putim planti lain olsem sekuriti bikos ol raskol lain long Madang taun i muv i go aut nau long wokim trabel na stil long rurel bisnis lain.

Madang Polis Stesin Komanda, Sinia Inspekta Vincent Isanda i tokaut long dispela long las wiken bihain long wangepa stil pasin i bin kamap long Karkar ailan.

Mista Isanda i tok ol polis i gat bikipela bilip olsem dispela stil pasin long Karkar ailan em ol raskol lain blong Madang taun i go pulim ol lokal man long ples na ol wantaim i kamapim.

Mista Isanda i tok dispela stil pasin i bin kamap long Kukul plantesin. Ripot i tok 11-pela man i holim gan na bus naip na go stilim mani mak bilong en i K21,300 na ol arapela samting em mani mak i olsem K25,000. Em i

tok namel long ol dispela stilman em foapela raskolman bilong Madang taun husat i go long Karkar ailan long wokim trabel.

Em i tokaut olsem ol lain stilman ya i yusim banana bot long ranawe i go long bikples long not kos rot (NCR) na bihain ol i ronawe.

Kukul plantesin em wangepa bisnis bilong Biabi Grup ov Kampani na dispela kampani i stap longpela taim tru long Karkar ailan na save givim sevis long ol pipel long ailan.

Senia Inspekta Isanda i tok amamas long NCR Rural Polis Komand, long Dylup plantesin husat i kisim tok save na kwiktai tru i kamapim rot-blok na holimpasim tripela saspek klostu long Banap. Ol dispela lain nau i stap long Jomba polis sel.

Mista Isanda i tok Madang taun nau i wok long lukim planti namba bi-

long ol polisman na meri i wokabaut raun na dispela i mekim ol raskol lain i pèt na wok long goaut long wokim stil pasin long ol bisnis haus long rurel eria.

Madang nau i lukim planti ol yangpela polisman meri em ol nupela polis rikut long Bomana Polis Koles, husat i stap na wokabaut na daunim hevi bilong raskol pasin namel long Madang taun i gat ol Mobail Skwat 13 bilong Lae tu nau i stap long Madang long wokim operesen long eviksen o rausim ol iligal sitelmen long taun.

Mista Isanda i wokim strongpela toktok i go long ol bisnis lain long rurel stesin long Madang na tu ol distrik hetkwata olsem Aiome (Midel-Ramu), Kinim (Sumkar), Saidor (Raikos), Bogia (Bogia) na Walium (Usino-Bundi) long strongim sekuriti bilong ol long stopim ol stilman long kamapim trabel.

# Papagraun kampani REL sevim ol Ramu NiCo wokman



Tupela wokmeri bilong REL Renatha wantaim Margaret Golu sevim kaikai long ol wokman bilong Ramu NiCo long Madang Inn. Foto: James G. Kila

James G. Kila i raitim

WANPELA lenona kampani insait long Ramu NiCo Projek long Madang provins i save givim gutpela helpim long mesing long trensit haus bilong Ramu NiCo long Madang Inn.

Dispela lenona o papagraun kampani Raibus Enjiniring Limited (REL) i save givim ol sevis long divelopa Ramu NiCo Menesmen (MCC) long Madang taun, Kurumbukari Main na Basamuk Rifaineri.

Em i save givim ol sevis long wok meintenens, klinim ol haus slip long KBK Main na long Madang bes na long Basamuk Rifaineri em long wok meintenens.

REL i givim wok long planti ol yangpela

meri long kuk long mes long Madang Bes bilong Ramu NiCo. Planti ol dispela yangpela meri i save amamas long kukim ol naispela kaikai bilong stail bilong Saina wantaim ol sef bilong Saina na sevim long Madang Inn.

Planti lain husat i save go kaikai long Madang Inn i save amamas long stail kaikai bilong Saina we em pait wantaim sup bilong lombo na gutpela long rausim sik na fat long bodi.

Madang Inn long taun bilong Madang em ples we ol wokman bilong Ramu NiCo i save go stap na malolo na redim ol yet long go long ples bilong ol o go bek long wok long Basamuk na Kurumbukari Main. Em i stap olsem trensit ples bilong ol wok lain.

# Gavman i no givim mani bilong liklik bisnis

**GAVMAN i no givim yet K200 milien em i tok long givim dispela yia long kirapim ol liklik bisnis o SME.**

Gavman i bin tok promis long givim K1 bilien long kirapim ol liklik bisnis long kantri aninit long SME program bilong gavman long helpim ol liklik manmeri PNG i statim ol liklik bisnis.

Tasol dispela K200 milien gavaman inap long givim long SME Corporation i no go insait yet.

Deputi Siaman bilong SME Corporation, Des Yaninen, i tok Praim Minista Peter O'Neill i bin tok promis long givim namba wan K200 milien long dispela yia.

"Long mun Februari, taim mipela i bin lonsim SME Corporation, Praim Minista O'Neill i bin tok promis long givim dispela mani long

helpim ol manmeri statim ol liklik business," Mista Yaninen i tok.

Mista O'Neill i bin tok gavman bai givim K200 milien long wan wan yia.

Em i no tokaut sapos gavman bai givim dispela mani long SME Corporation o National Development Bank (NDB) long givim aut long ol manmeri na larim ol i ken kisim dinau mani na statim ol liklik bisnis.

"Gavman yet bai mekim dispela disisen, gutpela samting em gavman i laik helpim ol manmeri long mekim bisnis," Mista Yaninen i tok.

Dispela program bai helpim ol manmeri long statim bisnis, mekim moa mani na senisim laip bilong ol long ples.

Mista Yaninen i tok tenkyu

long Praim Minista O'Neill i tok promis long givim K200 milien long wan wan yia insait long 5-pela yia.

Dispela i soim olsem gavman bai givim K5 bilien long olgeta yia long helpim ol bisnis manmeri bilong PNG.

"As tingting bilong dispela program em long kirapim 450,000 nupela SME o liklik bisnis insait long 15 yia.

"Na long larim gavman i kirapim dispela namba bilong SME o liklik bisnis, em bai nidim taim na hat wok wantaim mani.

"Mipela i redi long helpim ol manmeri long kirapim ol liklik bisnis, groim na larim em i kamap bikpela. Mi tok tenk yu long luksave long wok mipela i mekim long helpim ol manmeri long mekim bisnis," Mista Yaninen i tok.

## Nupela bisnis lo bai helpim liklik bisnis

NUPELA lo bilong stopim ol ausait manmeri long kam insait long kantri na tekova long ol liklik bisnis bai kamap klostu taim tasol.

Deputi Siaman bilong SME Corporation, Des Yaninen, i tok dispela lo bai no inap stopim ol arapela bikpela foren kampani long kam insait long kantri na mekim invesmen, tasol em bai stopim ol ausait manmeri long tekova long ol sans bilong mekim liklik bisnis olsem haus kai, salim stua kaikai, salim ol liklik klos na sekenhen samting, na arapela ol bisnis we manmeri PNG yet i ken mekim.

Mista Yaninen i tok dispela lo i no kamap yet tasol tok-tok i wok long kamap long kirapim wanpela kain lo olsem.

Mista Yaninen i tok PNG i

nidim ol bikpela investa long karim mani i kam insait long kantri na mekim bisnis long hia, tasol ol liklik bisnis i mas go bek gen long han bilong ol manmeri bilong yumi yet.

"I no gat wanpela lo i stap yet, tasol mipela i toktok long kamapim dispela lo long helpim ol manmeri PNG yet i gat sans long mekim ol liklik bisnis," Mista Yaninen i tok.

Em i tok as tingting bilong dispela lo em long larim ol manmeri PNG yet i kirapim moa long 45,000 liklik bisnis insait long 15 yia.

Dispela bai kamapim tu milien nupela wok, apim takis mani bilong gavman i go antap long 50 pesen (nau em i tu pesen tasol), daunim namba bilong manmeri no gat wok i kam long 49 pesen

(nau i stap long 84 pesen), na apim namba bilong bisnis manmeri bilong PNG i go antap long 70 pesen (nau i stap 10 pesen tasol).

Mista Yaninen i tok ol bisnis manmeri bilong narapela kantri husat i kam mekim bisnis long PNG i no ken pret.

"Mipela i welkamim ol, bikos ol bai givim sans tu long ol liklik bisnis manmeri bilong yumi," em i tok.

Em i tok nupela SME Polisi bilong PNG i kam aut pinis na dispela polisi i tokaut long wanem kain wok gavman bai mekim helpim ol manmeri i kirapim ol liklik bisnis.

Tred, Komes na Industri Minista, Richard Maru, i bin go pas long kamapim dispela polisi.

## Gavman i sapatim egrikalsa sekta

WANPELA biknem man husat i save toktok strong long gavman i kirapim egrikalsa sekta i amamas long ol sevis gavman i wok long givim long pipel.

Siaman bilong Rural Industries Council (RIC), Sir Brown Bai, i tok em i ples klia gavman i wok long harim singaut na krai bilong ol manmeri na i wok long kirapim ol nupela maket, rot, bris na arapela ol samting

bilong sapatim egrikalsa sekta long PNG.

"Mi wanbel na amamas long gavman i mekim gutpela wok. Nupela Madang Maket na nupela maket long Pot Mosbi bai helpim ol manmeri bilong yumi long yusim dispela kain gutpela sevis long salim ol samting na mekim bisnis," Sir Brown i tok.

Em i tok Gros Domestik Prodak (GDP) bilong kantri i stap long han bilong ol liklik

manmeri husat i wok long mekim ol liklik bisnis long infomol sekta tasol gavman i no gat wanpela stretpela namba na ripot long hamas mani stret ol i wok long mekim.

Mista Bai i tok taim gavman i kirapim dispela kain nupela maket na ol samting, level bilong mekim mani long infomol sekta i save go antap na moa mani i save raun insait long komyuniti na kantri.

## KSL makim nupela eksekutiv

FAINENSAL sevis kampani bilong PNG, Kina Securities Limited (KSL), i makim tupela nupela man long kamap senia eksekutiv bilong dispela kampani.

Sif Eksekutiv Opisa (CEO) bilong KSL, Syd Yates, i tok ol i makim Deepak Gupta i kamap Eksekutiv Jeneral Menesa bilong Welt Menesmen, na Chetan Chopra i kamap Sif Fainensal Opisa.

Mista Yates i tok em i amamas long welkamim Mista Gupta, husat i gat planti yia ekspresn long welt menesmen wok, na lukluk i go het long em i ken wok wantaim ol senia wok manmeri long KSL.


Mista Gupta i bin wok olsem wanpela senia eksekutiv wantaim sampela ol bikpela fainensal sevis kampani olsem Westpac, AMP na sampela ol kampani long Nu Silan.

Dispela ol wok i bin lukim Mista Gupta i mekim ol wok long fan menesmen, praivet ekwiti invesmen, fan edministresen, koporet trastisip, na fainensal plening.

Mista Gupta i gat ekspresn long gavanens long ol bikpela stok maket bikos em i bin wok long Australian Securities Exchange (ASX) na New Zealand Exchange (NZX).

KSL i stap long Port Moresby Stock Exchange (POMSoX) na ASX.

## Dairek flait bai kamap long PNG, Saina



Praim Minista Peter O'Neill wantaim Presiden Xi Jinping.

BALUS bai ran i go stret long Beijing, Saina na i kambek long Pot Mosbi long dairek flait bihain long Praim Minista Peter O'Neill na Presiden bilong Saina, Xi Jinping, i sainim wanpela agrimen long Saina long las wik.

Praim Minista Peter O'Neill i bin go raun long Saina long las wik na long dispela ran bilong, em i bin salim planti gutpela agrimen long helpim PNG.

Wanpela bilong dispela agrimen em i ol i kolim ea sevis agrimen. Dispela ea sevis agrimen bai lukim ol balus i kam long Saina long dairek flait na pundaun long Pot Mosbi o Komo Intanesenel Ples Balus long Hela Provins.

Mista O'Neill i tok dispela agrimen bai

bringim moa turis manmeri long Saina na tu planti ol bisnis manmeri na investa bai painim isi long kisim dispela dairek flait.

"Presiden Xi i laikim planti turis manmeri na bisnis manmeri bilong Saina long kam raun long PNG long malolo o long bisnis," Mista O'Neill i tok.

Em i tok Presiden Xi i laikim ol manmeri long Saina long kam raun long PNG na lukim ol kainkain pasin kalsa, bilas, solara, bus na wara long PNG.

Mista O'Neill i tok Presiden Xi i wanbel long larim Gavman bilong Saina i promotim PNG olsem wanpela gutpela kantri we ol turis long Saina na Esia i ken kam kisim kolwin na malolo arere long nambis bilong PNG.

Sir Brown i tok KMHL i gat wanpela liklik invesmen bilong em tasol long Solwara 1 dip si maining long is Nu Briten.

Em i tok long larim KMHL i kamap wanpela bikpela kampani long maining industri long PNG yet, gavman i mas lusim Ok Tedi Maining long han bilong Petromin.

"Mi toktok long Ok Tedi. Gavman i mas lusim OTML long han bilong KMHL na larim mipela i lukautim.

"Mi laikim gavman long salim sea bilong em long Bogenvil Kopa i kam long KMHL, na strongim dispela nupela kampani," Sir Brown i tok.

Sir Brown i tok ol i laik kisim sampela moa sea long Solwara 1 dip si maining projek.

Petromin i givim tupela kampani bilong em, Eda oil na Eda LNG, i go long Kumul Petroleum Holdings Limited (KPHL), na tu sampela ol aset bilong en i go long KPHL.

## Sir Brown: Givim Ok Tedi long KMHL

SIAMAN bilong Kumul Mineral Holdings Limited (KMHL), Sir Brown Bai, i laikim gavman long givim olgeta maining na ol mineral aset i go long dispela nupela kampani.

KMHL em pastaim ol i save kolim Petromin PNG Holdings Limited, tasol Praim Minista Peter O'Neill, i laikim dispela kampani long lukautim ol bisnis bilong gavman long maining na mineral sekta tasol.

# Madang Eben LLG i no gat ki bilong opim maket

BIHAIN long ol Minista bilong gavman na Embeseda bilong Japan i wokim opim nupela Madang taun maket long ai bilong planti tausen pipel, maket i pas yet inap nau bikos Madang Eben Lokal Level Gavman (MULLG) i no kisim ki bilong maket yet.

Ol lain bilong salim kaikai i no go insait yet na wokim maket. Ol i stap autsait na maket arere long ol rot long taun yet.

Nau yet i gat tok pait i go kam long menesmen bilong maket na tu MULLG i tok ol i no kisim ki yet long Madang provinsal gavman long opim maket. MULLG i tokaut olsem ol i papa tru bilong maket.

Stat long dispela wik Mande Madang taun maket i no lukim ol lain bilong salim kaikai na ol arapela samting i muv i go insait long salim ol samting.

Meya bilong Madang taun, Joe Yama i tokaut long dispela long Mande, na i tokaut olsem MULLG em i papa bilong maket bikos ol yet i wokim proposal long bringim dispela projek i go long Madang. Tasol nau planti

kain kain politik i go insait bihain long bikpela projek i kirap.

Mista Yama i tokaut long NBC Redio Madang olsem ol pipel bilong maket i pas yet bikos MULLG i no kisim ki long han bilong em yet.

Em i tokaut olsem em i save olsem Japan Intanesenel Korporensen Ejensi (JICA) na Nesenel Fiseris Atoriti (NFA) i laikim indipenden bodi long kontrolim menesmen bilong maket.

Mista Yama i tokaut olsem em i gat wanpela menesmen tim pinis we i makim olgeta stekholda long Madang husat bai lukautim maket.

Em i tokaut olsem em wantaim 10-pela kaunsila bilong em i no bin stap long opening sere- moni long las wik Fraide bikos ol i no amamas tumas long protokol long redim ol samting long opim nupela maket.

Mista Yama i tok taim MULLG i kisim ki bilong nupela maket long han bilong Madang gavman ol bai wokim wanpela opening sere- moni bilong ol yet na opim maket.

# Digicel bungim ol fama wantaim bisnis



Digicel i go insait long Bogenvil Soklet Festival.

DIGICEL i selebretim namba wan Bogenvil Soklet Festival long Buin na Arawa long las wik, olsem em i wanpela bikpela kampani bilong bringim komyunikesen i go long ol fama na ol stekholda long rijon.

Digicel i bin stap long Festival long soim ol kain kain prodak na servis em i ken givim ol pipel, olsem wanpela komitmen bilong en long bringim gutpela telekomunikesen servis long PNG.

Digicel PNG CEO, Maurice McCarthy, i tok em i

gat bikpela amamas long givim ol gutpela network bilong komyunikesen long olgeta hap bilong Bogenvil rijon, long helpim ol fama husat i laikim isi wei bilong toktok i go i kam long liklik man i tasol.

"Mipela i amamas long sapotim laip bilong ol fama long rijon wantaim gutpela komyunikesen servis long helpim ol long kirapim moa prodaksen na kamapim rilesensip wantiam ol narapela lain insait long indastri," Mista McCarthy i tok.

"Ol Digicel wok tim bi-



Bogenvil Soklet Festival.

long Kokopo na Buka i bin go insait long Festival bilong dispela yia long soim ol servis bilong mipela we i save mekim laip isi long PNG, winim ol taim bipo," em i tok.

Mista McCarthy i tok, Digicel i amamas long stap insait long ol Festival we i bin gat ol so bilong egrikalsa, ol woksop na ol stori bilong ol intenesenel Soklet na rot bilong kisim moa bisnis long soim ol prodak bilong ol long ol lokal komiuniti.

"Digicel i lukim bikpela

sans lng konekim ol komi- uniti na sapotim Bogenvil Soklet Festival we i bungim ol kakao fama, ol lain bilong wokim Soklet na ol narapela lain long liptimapim prodaksen bilong gutpela kwaliti kakao long Bogenvil," em i tok.

Dispela namba wan Bogenvil Soklet Festival i bin stat long Mande Julai 4 na i go pinis long Fraide Julai 8, olsem wanpela we bilong sapotim Atonomas Bogenvil Gavman long kamapim sastenebel divelopmen egrikalsa indastri.



## TribeFM Teen Ekselens Awot 2016

### Nominetim 'Teen Hero' bilong yu

*Yu save long wanpela yangpela man o meri husat i soim pasin bilong lidasip na save long planti wok insait long komyuniti?*

2016 nupela TribeFM Teen Ekselens Awot bai selebretim 7-pela yangpela man na meri bilong olgeta hap bilong Papua Niugini, krismas bilong ol namel long 13 na 19 husat i soim olsem ol i gro o senisim pasin, lidasip na ol i gat komitmen long komyuniti ol i stap long en.

#### OL KATEGORI NA KRAITIRIA

*Ol nomini i mas soim ol ko veliu bilong gro o senisim pasin, lidasip na komitmen.*

#### HELT NA WELFE

Dispela yangpela man o meri bai soim olsem em i gat strongpela pasin bilong kamapim gut helt bilong em na bilong ol narapela husat i stap insait long komyuniti bilong ol wantaim ol aktiviti we i save strongim ol tingting na pasin bilong gutpela helt long ol skul, famili na ol komyuniti grup.

#### MUSIK NA ATS

Em bai soim olsem dispela yangpela man o meri i gat namba wan kain save na stail bilong ats na music na sapela taim em i yusim long kamapim senis insait long ol komyuniti bilong em.

#### SPOT

Dispela yangpela man o meri bai soim gutpela pasin bilong stap strong long spots na i pilai gut tru na em i yusim save na stail bilong em long kamapim gutpela sindaun long komyuniti.

#### KOMYUNITI

Dispela yangpela man o meri i soim olsem em i save tingim nid bilong ol narapela pipel pastaim long em yet, na em i save givim ol taim bilong em yet na strong bilong em long helpim komyuniti bilong em.

#### EDUKESEN

Dispela yangpela man o meri husat i soim olsem em i save mekim gut long edukesen bilong em o i kamap gut long skul bilong em, o husat i gat stori long em i save helpim ol narapela lain long lainim samting.

#### BISNIS NA INOVESEN

Dispela yangpela man o meri i mas soim olsem em i save painim ol nupela kain we bilong wokim samting na i mekim wanpela wok bisnis we i helpim em yet na komyuniti bilong en.

#### DISABILITI

Dispela yangpela man o meri i mekim senis long helpim ol lain husat i gat disability, na tu ol yangpela man na meri husat i gat disability tasol i wok long senisim laip bilong ol yet na bilong komyuniti tu.

#### WEI BILONG NOMINETIM MAN

Pulimapim dispela fom wantaim olgeta stori bilong wanem yangpela man o meri yu laik nominetim. Sapos yu lusim sampela hap bai mipela i no inap kisim fom bilong yu.

**Ol entri i MAS kam insait long 5 klok apinun long Fraide 22 Julai 2016.**

Pliis givim fom bilong yu i go long TRIBE 92FM long wanpela bilong ol dispela kain wei:

Salim pas: Tribe92FM, NBC, P O Box 1359, Boroko, Port Moresby, PNG.

Yu yet bringim i go long wanpela provinsal NBC OPIS klostu long yu

Salim long Fesbuk pes bilong TribeFM (salim wanpela poto bilong fom yu pulimapim pinis)

Salim long Whatsapp i go long 70199105 (salim wanpela poto bilong fom yu pulimapim pinis)

Yu ken ring long telepon namba 325 3439 namel long 8.30 moning taim i go long 4.30 long apinun, Mande i go Fraide o salim email long [wgorogo@nbc.gov.pg](mailto:wgorogo@nbc.gov.pg).

## NOMINETIM 'TEEN HERO' BILONG YU LONG NUPELA TRIBE92FM TEEN EKSELENS AWOT

Pliis TIKIM WANPELA bilong ol dispela kategori long nominetim TEEN HERO bilong yu:

- ★ HELT NA WELFE
- ★ EDUKESEN
- ★ DISABILITI
- ★ SPOT
- ★ KOMYUNITI
- ★ BISNIS NA INOVESEN
- ★ MUSIK NA ATS

STORI BILONG NOMINI (Teen Hero):

Nem bilong em: \_\_\_\_\_

Adres bilong em: \_\_\_\_\_

Bon De: \_\_\_\_\_

Fon namba bilong em: \_\_\_\_\_

STORI BILONG NOMINETA:

Nem bilong em: \_\_\_\_\_

Rilesensip bilong Teen Hero bilong yu wantaim yu (papamama, tisa, Sios lida): \_\_\_\_\_

Adres bilong yu: \_\_\_\_\_

Fon namba bilong yu: \_\_\_\_\_

**Long narapela hap pepa, tok klia long wanem as na Teen Hero bilong yu i mas kisim luksave long dispela yia Awot bilong TTEA. Pasim dispela pepa wantaim dispela fom.**

Yu MAS soim klia ol sampela eksampel bilong soim wok we dispela yangpela man o meri i soim long gro bilong em yet, lidasip na komitmen long kategori yu wok long nominetim em.

Ol Lo bilong go insait:

- Em i op long olgeta lain i stap insait long PNG
- Krismas bilong ol nomini i mas stap namel long 13-19
- I ken nominetim ol grup/tim
- Ol nominesen i mas stret na i kam stret long yu
- TribeFM bai makim sampela lain long skelim na makim
- Sapos ol jas i lukim olsem i no gat gutpela lain long wanpela kategori, bai i no gat awot long dispela kategori
- Ol lain i stap long fainel mak bai kisim toksave long telepon
- Ol wina bai kisim awot/fainensel sponsasip we bai ol i mas yusim gen long wanem kategori ol i win long en
- Nem na poto bilong ol wina bai kamap long ol media

Sapot i kam long:



# Blues winim gem 3 Maroons winim Siris



Maroons i kisim taitel gen bilong dispela yia 2016 taim ol i winim tupela gem bilong ol taim ol i kisim ol NSW Blues.

Long las gem bilong Stet ov Oriijin, Blues i kik ov i go long sait bilong ol Maroons. Maroons i no westim taim long tromoi bal i go kam insait long lain bilong ol yet.

Long 3 minit insait long pilai, Maroons i kisim wanpela skram long lus bal long pilai bilong Blues, dispela i mekim ol Maroons i kisim strong long go insait long lain bilong ol Blues.

Maroons i tromoi bal go kam na long 5 minit bilong pilai we Greg Inglis i putim namba 18 trai bilong em long Stet ov Oriijin pilai long sait lain bilong ol Blues. Thurston i misim kik na skoa i stap olsem 4-0.

Blues i mekim bikpela pilai long 20 minit bilong pilai long namba wan hap. Ol tu i tromoi bal go kam na lukim banis bilong Maroon i op, 21 minit i lukim lok fowod bilong Blues, Tyson Frizell, i putim trai. Maloney i kikim gol i go insait long kisim skoa 6-4.

Blues i kisim planti penelti long namba wan hap, tasol ol i no kikim gol. Dispela i mekim banis bilong ol Maroon i strong. Cooper Cronk i kisim 10 minit long sin bin bihain long wanpela paul em mekim. Maroons i gat 12 man tasol long pilai graun, tasol ol i strongim banis bilong ol inap pilai i pinis long namba wan hap.

Blues i kam bek strong tru long namba tu hap na long 42 minit ol i putim trai long mekim skoa bilong go ol i 12-4, bihain long kik bilong Maloney i go insait.

Maroons i kam bek strong long 50 minit na putim trai. Dispela i mekim skoa bilong ol i go antap long 10 -12, bihain long Thurston i kikim gol go i insait.

Tupela tim wantaim i strongim banis bilong ol. Blues i kisim planti sans, tasol ol i no mekim sans long skoa.

Maroons kisim wanpela sans long hai kik bilong Cooper Cronk na winga bilong Blues i no ketsim dispela bal na mekim Darius Boyd i ketsim na go putim traime long 74 minit. Thurston i misim kik na skoa i stap 14-12.

Tupela minit bipo long pilai i pinis Blues, i kisim wanpela lus bal na winga bilong i ran long lain bilong ol go klostu long lain bilong ol Maroons. Ol Blues i tromoi bal go, kam na spit man bilong ol Jennings, i kisim na ran i go na skoa. Kepten bilong Blues, Paul

Gallen, i kikim las go bilong em long Oriijin na mekim skoa 18-14 long full taim.

Maroon i winim siris na kepten bilong ol, Cameron Smith, i kisim pilaia bilong siris winim i Wally Lewis medol long namba foa taim olgeta.



Cristiano Ronaldo i apim tropi wantaim ol Portugal long namba wan taim.

## Euro 2016: Portugal i daunim France long ekstra taim

PORTUGAL i painim hat long kikim bal i go insait long tupela golpos inap long taim bilong pilai i pinis.

Tasol, ol i givim ekstra taim bihain long tupela tim wantaim i no kisim wanpela poin insait long 90 minit.

Long ekstra taim, ol Portugal i kikim bal i go i kam na ol i salim bal i go long pilaia bilong ol, Eder, husat i kikim bal i go insait long tupela golpos.

Dispela em i namba wan taim bilong ol long winim Euro taitel na ol Portugal i pun-daunim ai wara, bikos ol i win long wanpela poin.

Ol France i no pilim amamas we ol Portugal i amamas taim Cristiano Ronaldo i apim tropi long pes bilong tim bilong em. Planti lain i amamas na apim tropi wantaim na sampela i singaut long ol i daunim asples tim, France.

## Tour de Franch: Dumoulin i winim namba 9 stej

TOM Dumoulin bilong Netherland i go insait long fainel na i winim namba 9 stej bilong Tour de France resis taim Albert Contador i no resis.



Tom Dumoulin i amama long taim em i winim namba 9 stej bilong Tour de France resis

Raida Dumoulin, husat i kamap namba 6 long Vuelta resis long las yia i strong tumas long dispela yia resis taim i gat bikpela ren i pun-daun long taim bilong resis.

Dumoulin i pinisim tupela hap bilong resis na i win bihain Vuelta na Giro resis.

Ol narapela top raida i painim hat long winim pinis lain kwiktai em Alejandro Valverde, Fabio Aru na Tejay Garderen. Ol i lusim hap bilong resis taim ol i painim hat long winim namba wan maunten bilong resis.

Froome i traime hat na i go insait long fainel, tasol em i no inap long resis klotu long raida, Nairo Quintana, husat i kam namba tu long resis bilong yia i go.

Raida bilong Colombia i kamap namba 4, bihain long Froome.

Bipo tim poro bilong Froome, Richie Porte, Yates na Martin i kamap namba faiv long dispela resis.

## Murray i winim namba tu Wimbledon taitel

ANDY Murray bilong Britain i winim namba tu Wimbledon taitel na namba tri Gran Slam kraun bihain long em i daunim Milos Raonic bilong Canada wantaimn 6-4, 6-6 (7/3), 7-6 (7/2).

Murray i gat 29 krismas i skruim 2016 tropi i go antap long 2013 win bilong em long All England klap na 2012 long US Open.

Namba 11 fainel bilong bikpela resis i kamap, tasol namba wan resis bilong em i egensim Novak Djokovic. Murray i lus long dispela resis.

“Dispela em i bikpela resis bilong mi long olgeta yia. Mi save win na mi save lus long ol resis mi save pilai,” Murray i tok.

“Nau, mi pilai gut tru stret. Dispela win i kamap spesol bikos mi save lus long sampela taim. Mi amamas long holim dispela tropi gen.”

Raonic i tok dispela resis i kamap strong stret.

“Andy Murray i pilai gut na em i win na mi amamas na tenkyu tru long em i win,” Raonic i tok.

“Dispela lus bai kamap olsem wanpela mak long skin bilong mi. Mi bai mekim olgeta samting long rausim dispela mak long skin bilong mi long narapela sans i kam.”

Win bilong Murray i mekim em long rausim belat bilong em taim em i lus long Australia na France Open fainel long dispela yia egensim Djokovic.



Andy Murray, bihain long em i winim Wimbledon.



# Ramu NiCo Projek statim gen wok operesin

**WANPELA** nikel na kobalt maining projek long Papua Niugini, Ramu NiCo Projek long Madang provins i statim bek wok operesen bilong en stat long Julai 1.

Wok i kirap gen bihain long tok-orait i kam long Mineral Risos Atoriti (MRA) long Jun 28.

Presiden bilong Ramu NiCo Menes-

men (MCC) Ltd, Wang Jicheng i tokaut long operesen i stat gen na i tokaut klia olsem Mains Inspektoret bilong MRA i karimaut wok sekim long Basamuk Rifaineri long mun Jun na i givim Kampani kondisinel tok orait long statim wok long hai presa esid litsing trein na trein tu.

Dispela ol HPAL trein em ol bikpela

masin we i save prosesim o tanim na kamapim miks haidroxaid prodak (MHP) em Kampani i save salim i go ovasis olsem ekspot.

Mista Wang i tok olsem wok operesen long Kurumbukari Main na Basamuk Rifaineri i stat bihainim ol wok sekim na tok orait long kirapim ol bikpela masin i

go stret pinis.

Em i tok olsem prosesing plent long Basamuk i stat wok pinis wantaim tupela autoklev. Taim bilong ful operesen em bai Kampani i givim toksave long bihain.

Mista Wang i tok olsem stat bilong HPAL trein namba tri bai kamap bihain bikos Kampani i bihainim lo bilong sefti na i larim moa wok painimaut i kamap gut long masin pastaim. Moa long en tu em i tok sefti bilong ol wokman em bikpela samting na Kampani laikim olsem wok sekim long trein namba tri i mas luksave na stretim hevi long masin na taim em i orait gut stret nau bai masin i ken statim wok bilong en.

Ramu NiCo Projek i bin stopim wok operesen long tupela wok eria bilong en long Madang stat long Epril 15 long dispela yia bihain long wanpela birua i bin kamap long HPAL long Basamuk Rifaineri. Dispela birua i lukim wanpela wokman bilong China i lusim laip bilong en na tupela PNG wokman i kisim bagarap. Dispela birua i bin kamap long Epril 12.

Nau yet olgeta wokman long Basamuk Rifaineri na Kurumbukari Main i go bek long wok bihain long ol i stap malolo sampela taim.




Wanpela long ol HPAL trein long Basamuk Rifaineri i givim smok.



Sefti opisa sekim ol wokman long kampani bas.



Ol Ramu NiCo wokman long Basamuk go long wok.





## Wisil i winim 100 mita resis kwalifai taim



Tupela marit, Tony na Alison Fairweather, i kosa na menesa bilong tim i sanap arere long Toea Wisil.

**NAMBA wan rana bilong Papua Niugini, Toea Wisil, i ran long 100 mita resis kwalifai taim bipo long tupela de i stap yet long fainel kwalifai taim.**

Wisil i resis long Suva, Fiji, long Sarere, Julai 9 i makim namba 23 ran bilong em long 100 mita resis long dispela yia.

Em i winim kwalifai taim, 11.32 sken, na i pinisim mak insait long 11.29 seken.

Monica Henao, meri husat i menesim tim PNG long resis i salim dispela toksave i

go long presiden bilong Etlek PNG, Tony Green, bihain long resis i pinis.

Green i amamas na tok tenkyu long Wisil long nem bilong Etlek PNG.

Wisil em i namba tu meri long kamap trek etlit long PNG long klostu taim, tasol em i hariap long winim mak bilong Olimpik kwalifai bihain long Mae Koime i winim dispela mak long Brisbane, Australia, long Mas 2007.

Long 2012 Olimpik Gems i kamap long Londo, Wisil i pinisim mak insait long

11.27 seken taim kwalifai taim em i 11.30 seken. Tasol, ol i no putim dispela taim i go insait long rekot bikos, bikpela win i ran long baksait.

“Bihain long resis i kamap long Lae long las mun, Wisil i winim mak long 11.32 seken na mi gat strongpela tingting olsem Wisil i inap long winim kwalifai taim,” Kosa bilong Wisil, Tony, i tok.

Etlek PNG i tok tenkyu long Osenia Etlek Asosiesen long ol i bin putim wanpela ples bilong Toea long resis.

## Tru Tru Wara i sapotim OSEP



Tupela wokman aninit long Osenia Spot Edukesen Program (OSEP) i soim Tru Tru Wara kontena olsem ol i amamas long sapotim ol spot ektiviti long kantri.

## Seleksen bilong U-20 nesenel netbal tim i kamap long Fraide

ANDA-20 nesenel netbal tim i makim ol pilaia husat bai go resis long Rijonal Wol Yut Kap kwalifai long las wik Fraide long Rita Flynn pilai graun long Pot Mosbi.

I gat 30 pilaia i resis long winim ples long go pilai long Wol Yut kap kwalifai resis aninit long ol tim ol i makim em Nesenel Geming Kontrol Bod junia nesenel netbal sempionsip resis i pinis long

las wik Fonde.

Hetmeri bilong makim ol pilaia, Pole Kassman, i tok de namba wan bilong makim ol pilaia i kamap long skil fitnes, kwik muvmen, skil na divelopmen wantaim resis asesmen gem.

“Ol skwat em ol i katim i kam daun long 20 pilaia na ol i bin tokaut bihain long laspela asesmen bilong gem i kamap long las wik Sarere

apinun,” Kassman i tok.

Fainel 12 memba tim em ol bai makim long Ogas long ol bai resis long Rijonal Wol Kap kwalifai tonamen long Auckland, Nu Silan, long Septemba 24 inap 27 long dispela yia.

Ol top 3 kantri long kwalifai long Septemba bai makim Osenia rijon long 2017 Wol Yut Kap resis bai kamap long Botswana.

## POMNA i pinisim ol gem

POT Mosbi Netbal Asosiesen (POMNA) i pinisim ol gem ol i no bin pilai long dispela sisen bipo long ol i statim ol fainel.

Vais tresera bilong POMNA, Christabella Amona, i tok ol gem ol i no bin pilai em long raun namba wan na 67 gem aninit long junia divisen em ol i bin pilai long Rita Flynn pilai graun long las wiken.

Risalt bilong anda-20 i sanap olsem, ol Sparrows i daunim ol Rebels, 16-9 Mer-

maids (2) i strong nogut tru na daunim ol Paramana, 20-9.

Long narapela tupela gem Pot Mosbi Intenese-nel Skul i I kisim fri poin egensim ol birua tim bilong ol, Veupunama na wankain samting i kamap long Kawaimini egensim Mermaids (1).

“Long dispela wik, ol tim i go insait long nokaut bilong resis na gren fainel bai kamap bihain long tupela wik i kam,” Amona i tok.



Ol tim i no bin pilai long raun namba wan i bin pilai long las wiken, bipo long go insait long ol fainel. Dispela netbal resis i kamap long Rita Flynn pilai graun long Pot Mosbi long las wiken.

TRU TRU Wara bren long Paradise Beverages aninit long Piwe PNG Bena i joinim bikpela spot edukesen program insait long kantri olsem sponza bilong beverej.

Osenia Nesenel Olimpik Komiti i kamapim Osenia Spot Edukesen Program (OSEP) long redim spot edukesen long ol lain husat i lakim spot na pilai spot insait long Pasifik.

Dispela program i kamap namba wan taim long Papua Niugini long trening na kamapim rot bilong profesenel na ol lain husat i laikim spot long Pasifik long kirapim tingting bilong planti lain long pilai spot long ol komyniti na kamapim ol sempion pilaia long intenesenel level aninit long namba wan spot

edukesen program.

“Paradise Beverages i amamas long sapotim Osenia Spot Edukesen Tim insait long kantri long ranim bikpela namba moa long 100 lain wantaim 13 Nesenel Federesen olsem Badminton, Judo, Softbal, Ragbi Union, Swiming, Basketbal, Volibal, Boksing, Hanbal, Disabiliti Spot, Netbal, Kriket na Triathlon i stap long Masta Eduketa trening kos,” Maketing Menesa bilong Paradise Beverages, Jessica Kuambu, i tok.

Taim ol i lonsim dispela program long namba tu mun bilong dispela yia, Tru Tru Wara i sapotim planti spot ektiviti long ol iven olsem 2016 OFC tonamen, 2-de Kriket Intenesenel resis

namel long PNG Barramundis na Kenya, Trukai Fan Ran na Nesenel Junia Netbal Sempionsip i kamap long Julai 4 inap long 6.

Netbal Junia Sempionsip resis em ol i laik makim ol pilaia long go pilai bilong anda 21 tim bilong PNG long go pilai long Rijonal Wol Yut Kap kwalifai long pinis bilong mun Septemba long dispela yia long Auckland, Nu Silan.

“Paradise Beverages i stap bilong promotim, amamasim na strongim laipstail bilong olgeta pipel bilong Papua Niugini na amamas long sapotim spot divelopmen long PNG. Promotim PNG olsem wanpela hap bilong pilai spot long Pafifik Rijon,” Kuambi i tok.

# Selekta bilong netbal i tokaut long unda-21 skwat



Ol netbal pilaia i resis long Rita Flynn pilaia graun long taim bilong seleksen.

**NESENEL selekta bilong netbal i tokaut long 20 pilaia bilong Papua Niugini Unda-21 netbal tim long go resis long Osenia kwalifaia long Nu Silan long mun Septemba.**

Ol pilaia ol i bin makim i bin stap insait long nesanel junia sempionsip long Pot Mosbi. Kosa bilong Pepes, Unaisi Rokoura, bai givim ol skul toktok na trening aninit long em.

Ol asesmen bilong ol i bin stat long Mande na pinis long Tunde long Rita

Flynn Netbal pilai graun.

Ol skwat bai go insait long bikpela trening bipo long ol bai makim fainel skwat.

Long stat inap long kwalifaia long pinis bilong dispela mun, Unda-21 tim bilong Singapore bai kam long Pot Mosbi long pilai wanpela traim resis egensim ol Anda-21 bilong PNG husat ol bai makim long en.

Presiden bilong Netbal Papua Niugini, Julienne Leka-Maliaki, i tok, tupela

de ol i bin makim bilong trening em i bikpela samting bikos mipela i mekim wok redi long kamapim strongpela Anda-20 tim bilong wol kap kwalifaia.

Kwalifaia bai kamap long Septemba long Nu Silan bilong makim wanpela tim long go resis long Wol Yut Kap bai kamap long Botswana long mun Julai 8 inap 16 bilong yia i kam.

Junia nesanel seleksen panel i makim 20 pilaia bilong anda-20 swat em:

Ol suta;

- 1 Boio Peter bilong POMNA,
- 2 Jeperth Tulapi bilong POMNA,
- 3 Naolyn Mahuta bilong Sentral,
- 4 Ravusiro Vali bilong Sentral,
- 5 Naomi Lankan bilong KHNA,
- 6 Rowena Djengozov bilong POMNA na,
- 7 Martha Mutuka bilong POMNA

Senta kot/pilaia;

- 1 Eloise Vele bilong POMNA,
- 2 Catherine Benedict bilong POMNA,
- 3 Erika Amos bilong LAE,
- 4 Carol Kanapoti bilong POMNA,
- 5 Vele Walo bilong Sentral,
- 6 Michelle Mark bilong POMNA na,
- 7 Nona Gamoga bilong Sentral.

Ol Difenda

- 1 Courtney Abel bilong Alotau/Brisbane,
- 2 Edna Pala bilong POMNA,
- 3 Asi Kevau bilong KHNA,
- 4 Thai Peter bilong MKWNA,
- 5 Serena Ovia bilong POMNA na,
- 6 Genevieve Ume bilong POMNA

## Hunters i welkam long nupela pilaia

PAPUA Niugini SP Hunters i makim nupela pilaia long trening wantaim ol skwat bilong Hunters long dispela wik.

Kepten bilong Galp Isapeas tim aninit long Digicel Kap resis, Berbard Goma, i trening wantaim ol Hunters long namba wan taim long dispela wik.

Goma i bin pilai 13 raun gem wantaim ol Isapea long Digicel Kap resis. Em i bin pilai long ol lokal resis long

ol skul, tasol em i hariap tru long go insait long nesanel level long Digicel kap na go het long intenesenel level.

Kosa bilong PNG SP Hunters, Michael Marum, i tokim ol nius lain olsem planti long ol pilaia bilong em i kisim bagarap na long dispela astingting, em i makim Goma olsem bekap pilaia bihain long em i lukim kala bilong em long nesanel level.

“Bernard em i namba wan pilaia we skil, stail na lidasip

bilong em i makim em long joinim ol Hunters. Na tu, sampela pilaia bilong mipela i kisim bagarap na mipela i nidim sampela pilaia long stap bekap,” Marum i tok.

Goma i amamas long joinim tim we em i save driman long joinim. “Mi gat bikpela amamas na laik long pilai wantaim dispela kain tim i gat bikpela luksave we em i save makim kantri long intenesenel resis,” Goma i tok.

“Tenkyu tru long ol opisal bilong PNG Hunters long lukluk long kala bilong mi na mi bai pilai strong long strongim dispela kala bilong mi, bilong ol i ken lukim.”



Bernard Goma i trening wantaim ol skwat bilong Hunters.



Goma i brukim banis bilong ol Waghi Tumbe long Digicel Kap resis we Galp Isapea i daunim ol mangi Waghi.

## Lewas i go long kwalifaia resis long Samoa

NESENEL kriket tim bilong ol meri Papua Niugini, CPL PNG Lewas, i lusim kantri long Tunde na i go long Samoa long resis long 2016 Intenesenel Kriket Kaunsil (ICC) Is Esia Pasifik (EAP) Rijonal Kwalifaia resis.

Ekspiriens pilaia, Pauke Siaka, i kamap kepten bilong 14 meri pilaia we het kosa, Rodney Maha, i go pas long tim wantaim ol opisal.

Maha i tok tim i bin trening strong long resis long dispela kwalifaia na ol i lukluk long

mekim PNG i amamas taim ol i go insait long ICC Wol Kap resis bilong ol meri long 2017 we Ingran bai go pas long dispela resis.

PNG bai pilai egensim ol tim Samoa, husat i go pas long dispela kwalifaia resis long taim ol i opim resis na ol i luluk long bekim win bilong Samoa long 2015 Pasifik Gems.

Maha i tok ol i skul gut long ol sampela hap ol no klia na nau wanpela strongpela gem bai kamap egensim asples tim.

Ol gem bai stat long Julai 15 i go inap 23.



Skwat bilong CPL PNG Lewas i sanap long ples balus na i redi long go long Samoa.

## Wisil i namba wan meri long kwalifai

NAMBA wan rana bilong Papua Niugini, Toea Wisil, em i namba wan meri long kamap kwalifai long trek na fil resis bilong ol meri etlit long ol Pasifik Ailan kantri.

Wisil, husat bai go resis long 2016 Olimpik Gems long Rio i tok tenkyu long Bikman long helpim em long winim driman bilong em.

“Mi lusim papa na brata bilong mi long wankain mun tasol mi laik tok tenkyu long God long dispela talen na helpim mi long winim driman bilong mi,” Wisil i tok.

“Mi no lus tingting long driman bilong mi; dispela em i laip bilong mi na mi gat bikpela bel hangre long

winim dispela driman.

“Mi bin pilai etletik inap long 12 yia na nau mi gat bikpela amamas bikos, dispela em i bikpela taim bilong mi, kosa bilong mi na ol lain husat i stap baksait long mi.

“Mi no bilip long dispela. Mi bin givim taim bilong mi long trening dispela hatwok i karim kaikai na mi amamas.”

Wisil i tok moa olsem, “Taim yu i gat wanpela driman, yu no ken lusim. Yu wok hat long winim driman bilong yu. I no gat wanpela samting bai yumi kisim fri long laip.”

Kosa bilong Wisil, Tony Fairweather, i tok Wisil bai i

no inap resis long priliminari raun we dispela bai mekim isi long em.

“Ol i bin makim em pinis long Tim PNG tasol em i gutpela long em i ken kam long hia na resis long kwalifaia,” Fairweather i tok.

“Dispela i minim olsem kwalifaia resis bai stopim em long go long priliminari raun. Em bai no inap long wok hat gen long kamap kwalifai gen taim em i go long hap.

“Sama sisen em i longpela tru na mipela i resis planti. Sapos mipela go insait long wankain sisen long hap bilong resis em mipela bai kisim sampela gutpela risal.”



**TRAIM BUN:** Bikpela fowod bilong Tarangau i traim long brukim banis bilong Royals long A gret pilai bilong long Pot Mosbi ragbi lig.



**YU KAM:** Winga bilong Isapea i traim long pusim pilaia bilong Tumbe long Digicel kap pilai bilong long Pot Mosbi. Isapea i win 24- 18.



**ISAPEA BOI:** Mangi bilong karim kon bilong kik i lukluk long kika bilong em taim referi i putim was long pilai namel long Isapea na Tumbe long Mosbi.



Ol poto:  
Nicky Bernard

**BLUES EM MIPELA YA:** Trupela blu sapota, ol lusim siris tasol ol i no wari ol stil sapotim tim bilong ol yet. Dispela tupela dai hat meri i sindaun na mekim plen bilong tupela long lukim las gem bilong Blus na Maroons long Tride nait.



**GO LONG WE:** Bikpela fowod bilong Tumbe i soim strong bilong em long pilai a bilong Isapea long Digicel kap resis bilong ol long Mosbi.



**GULF EM MI YA:** Ol sapota bilong Gulf Isapea i amamas taim tim bilong ol i win.



**TRUPELA GAVANA:** Tupela Gavana bilong Jiwaka na Galp i go lukim pilai na sapotim tim bilong tupela long Mosb taim Isapea i bungim Tumbe.



# SPOT'S

Lukim websait  
bilong mipela

www.wantokniuspepa.com

Namba 2183

Julai 14 - 20, 2016



## DIANA

Tuna

Niupela Swit Teist  
Nau Igat Moa Oil!



### PNG's ORIGINAL TUNA

**PNG MADE** Manufactured by:  
**RD TUNA CANNERS LTD.**



# BLUES WINIM LAS GEM

Lukim stori long pes 23

## Mitsubishi FUSO Rosa Bus



Apgred ensin  
130Hp  
4 silinda disel



**Ikamap Wantaim  
26 na 30 Sit**

Hariap nau na go long  
Boroko Motors dila bilong yu

PIKSA EM BLONG ILLUSTRASEN WOK TASOL

Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048  
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg  
Website: www.borokomotors.com.pg



MP1412294a

**BOROKO  
MOTORS**